

**IBIRI MURI AKA GATABO N° 30**

1. Ijambo ry'ibanze  
Ubwanditsi
2. Papa Benedigito wa XVI yasuye Afrika  
Padiri Fabiyani Rwakareke
3. Ubwiyunge ni Uburenganzira n'inshingano kuri buri wese (igice cya gatatu)  
Padiri Emmanuel Nyampatsi
4. Bikira Mariya atwigisha iki mu mwaka wa Liturujiya (igice cya kabiri)  
Fratri Théoneste Nzayisenga
5. Ijambo rya Padiri Mukuru wa Seminari ku munsu mukuru wa Mt.Piyo wa cumi  
Padiri Vincent Harorimana
6. Inkeri y'ishya  
Padiri Dominiko Ngirabanyiginya
7. Gatemezi gatatse  
Christophe Komayombi
8. Twizihije umunsu mukuru w'ishuri ryitiriwe Mutagatifu Matayo ry'i Busasamana  
Janvière Bazamuranga
9. Abasaveri bo muri Diyosezi ya Nyundo bahawe ubutumwa ku munsu wa Yubile yabo  
Didace Musebyukundi
10. Korali Magnificat ya Paroisse Muhororo yasuye Paroisse ya Gisenyi  
Françoise Bamurange
11. Dushakire hamwe inzira y'Amizero  
Padiri Yohani Damaseni Bizimana
12. Barahuye bifurizanya umwaka muhire  
Françoise Bamurange
13. Umupfakazi w'intangarugero yaratabarutse  
Patricia Dusabemariya
14. Ndasaba sintegeka  
Anthère Uzamberumwana
15. Komisiyo y'Ubutabera n'amahoro ya Diyosezi ya Nyundo yashoje amahugurwa y'imyaka icumi : umuvugo w'umwe mu bashoje ayo mahugurwa Thérèse Ntamuhanga
16. Buzima jya ejuru tera imbere  
Mariya Nyirabashoza
17. Ijambo rya Perezida wa Komite Nyobozi ya Paruwasi Kibuye ku munsu wa Missa y'umuganura ya Padiri Innocent Kubwimana (12.10.2008) / Ignace Banyaga
18. Shimira uwaguhanze  
Jeannette Mukarusengo
19. Imparirwa kurusha  
Rosine Twizerimana
20. Udukuru two hirya no hino  
Françoise Bamurange.

## IJAMBO RY'IBANZE

Ubuvandimwe nyabwo niyo mizero y' Afrika

Basomyi b'Umusemburo w'Ubusabane mukomeze mutubabarire gukererwa kubagezaho Akanyamakuru kanyu. Aho kaziye mujye mukakira nk'incuti ikugarukiye yaragize ibiyibuza kukugenderera. Nidufatanyaga hari ubwo tuzasubira kujya tubagereraho ku gihe .

Dushimiye cyane kandi dusaba imbabazi abatwoherereje inyandiko zigasa nka wa muntu wicara muri taxi ateze ko yuzura, urugendo rwe rukaba rwateshuka ku cyo rwari rugenewe. Nyamara inyandiko ziri muri aka gatabo n'ubwo zitubwira inkuru zabaye hambere, ziracyashimishije. icyo zihuriyeho gituma zidashaje nuko zitubwira ibyiza by'ubuvandimwe ariyo ntego yacu.

Papa Benedigito XVI ubwo aherutse gusura Afrika yerekanye ko ubuvandimwe nyabwo ari yo ntsinzi ya byinshi bishikamiye Afrika. Ateguriza Sinodi y'Abepiskopi izaba igenewe Afrika izabera i Roma mu kwezi kwa cumi k'uyu mwaka ( 4-25/10/2009) yaravuze ati : « Ubwo muri Kristu tugize umuryango umwe, tukaba dusangiye ubuzima, amaraso amwe ya Kristu akaba atemba mu ngingo zacu, bikatugira nyine abana b'Imana, umuryango w'Imana, inzangano ntizari zikwiye kuzongera kubaho, akarengane n'intambara ntibizasubire hagati y'abavandimwe »(O.R.F.n°12 du 24 Mars 2009).

Papa yibukije ko ibyo gushingira inyigisho z'Iyobokamana ku buvandimwe kugira ngo bifashe abanyafurika byifujwe kera na Kardinal Gantin hari muri 1988. Ariko no mu bihe by'intangiriro y'iyamamazwa ry'Inkuru nziza mu kinyejana cya kane undi munyafurika Lactance (260-325) yari yaranditse ati : « Umurimo wa mbere w'ubutabera ni ukwemera ko umuntu wese ari umuvandimwe. Kuko mu by'ukuri ubwo ari Imana imwe yaturemye, kandi tukaba twarabyawe na Yo ku buryo bumwe, itugenera ubutungane n'ubuzima bw'iteka, ntawashidikanya ko duhujwe n'isano y'ubuvandimwe. Utemera iyo sano ari mu cyaha » (Epitomé des Institutions Divines, 54, 4-5 SC 335, p.210).

Uwemera iyo sano y'ubuvandimwe aharanira kugira amahoro muri we, akiyunga n'Imana n'abavandimwe kugira ngo urukundo rube isoko y'ubuzima itemba muri bose. Padiri Emmanuel Nyampatsi yabitubwiye mu gice cya gatatu cy'inyandiko ye ivuga ubwiyunge. Agaragaza ko ku bireba uwahemukiye ubwiyunge busaba umutima usa n'uwa Kristu : umutima w'impuhwe. Aravuga ati : « Nawe iyo ubabariye uwaguhemukiye uba ukoze igikorwa cy'ubucunguzi kuko umwenda w'inabi yari kukwishyura uwumuvanaho ; ahubwo ukamuha impano yari yarabuze ariyo twita impuhwe ». icyakora anibutsa uwahemutse ko « Nawe asabwa gutera za ntambwe ebyiri za mbere zo kwiyunga n'Imana no kwiyunga na we ubwe, kugira ngo yumve neza uburemere bw'ibyo yakoze ahemukira mugenzi we ; yige n'uburyo bwo kubivamo ».Byisomere byose niho usobanukirwa binoze n'impanuro ze.

Ubuvandimwe Papa aturarikira bukenera kandi ko umuntu aba afite umutima uri mu gitereko, asenga, kandi agira ibikorwa byiza biba nk'imbuta yera ku iryo sengesho. Fratri Théoneste Nzayisenga aratubwira ko iyo iryo sengesho turinyujije kuri Bikira Mariya rigira kivugira nka bimwe by'i Kana. Turamushimira ko ibyo azirikana agira ubutwari bwo kubisangiza abandi kandi aracyabikomeje n'ubutaha azaza.

Hari n'abandi batugejejeho inkuru z'iminsi mikuru, aho bwa buvandimwe bwigaragariza cyane, bagashima ababagirira neza, n'abakora neza nk'uko Padiri Mukuru wa Seminari ya Mutagatifu Piyo na Musenyeri Dominiko bashimira Umushumba wa Diyosezi, bakanashima abaseminari barera, babaye ingenzi mu ruhandu rw'amashuri yo mu Rwanda.

Ab'i Busasamana Bazamuranga Janvier nabo arabavugaga ibigwi ; ishuli ryaragijwe Mutagatifu Matayo n'ubwo ryigeze kugira ibibazo ubu rifite amatwara ahamye yo guharanira kudahigwa.

Naho Didace Musebyukundi we, aratugezaho ibyavugiwe mu birori byo kwizihiza Yubile y'imyaka 50 ishize umuryango w'abasaveri ushinze muri Diyosezi ya Nyundo, muri izo mpanuro harimo n'icyizere cy'uko uwo muryango uzakomeza kugirira urubyiruko akamaro.

Bamurange Françoise we yanyuzwe n'ubuvandimwe buhuza abakunda Imana. Kuba Korali yo ku Muhororo yaraje gusura Paroisse ya Gisenyi, ikakirwa na Korali yo ku Gisenyi bisangiye izina rya Magnificat, arabibonamo ubupfura bwo gukomera ku murage w'urukundo rwa Kristu n'umuco mwiza wo gusurana uzahora uranga abanyarwanda.

Mu yindi nyandiko na none, aragaragaza ko yanyuzwe n'umwiherero w'abahujwe no kuba bakorera Diyosezi, barahuye birabashimisha biha gahunda yo kubikomeza mu bihe biri imbere.

Umusemburo w'Ubusabane urashima cyane Padiri Damaseni Bizimana ujya mu nama akibuka abasomyi bawo, yajya gusengera aho abahowe Imana biciwe akabitugezaho, murabyibuka namwe : ni incuti y'ukuri y'abasomyi twese. Noneho yazinduwe no kutubwira Ihuriro ry'i Nairobi ryayobowe n'abavandimwe b'i Taize. Nabishimirwe cyane atubere n'urugero.

Ibyo twasangiza abavandimwe ni byinshi, hari ibyishimo, ndetse n'akababaro nk'uko Patricie Dusabemariya avuga : umupfakazi w'intangarugero watabarutse, kuri we ugutabaruka kwa Consolatie Nyirahagenimana ni n'ibyishimo « kubera iyo ntware igiye kongera ubuvugizi bw'abapfakazi mu rusange rw'abatagatifu ».

Inyandiko ni nyinshi ntitwavuga imwe imwe ngo turangize, icyakora bose turabashimiye. Imana ibakomereze ubwenge n'umutima usangiza abandi ibyo yabahaye, muraza kwibonera ko hamaze no kuboneka benshi bashaka guhanika, bagatanga ubutumwa bwabo mu mivugo. Umusemburo w'Ubusabane uzabe n'urubuga runizihirizwamo ibiteza imbere umuco mwiza w'abanyarwanda.

Turabategereje mwese. Ntimugahigwe.

Ubwanditsi.

## PAPA BENEDIGITO WA XVI YASUYE AFRIKA

*Yasuye Afrika yugarijwe n'ibibazo, ariko ifite n'amizero menshi.*

Mu kwezi kwa Werurwe 2009, guhera taliki ya 17 kugeza ku ya 23, Nyirubutungane Papa Benedigito wa XVI yagendereye ibihugu bibiri byo muri Afrika : Kameruni na Angola.

Urwo rugendo ntirwari rugenewe ibyo bihugu byombi byonyine, Papa yasuye Afrika yose, yaje afitiye ibihugu byose by'Afrika ijamba ryo gukomeza abanyafrika bugarijwe n'inzitane z'ibibazo by'inzara, indwara, intambara n'akarengane k'ingeri nyinshi. Ibyo byose yagize icyo abivugaho. Yasabye Abanyafrika gushyira mu gaciro, bakamenya ko aribo bagomba guhaguruka bagakora bakigeza kw'iterambere rirambye bagahashya ibizitira ubusugire bw'imibereho yabo.

Abantu bakwicwa n'inzara bate kandi Afrika ifite ubutaka bwera, ifite abatwaga benshi bakiri bato? Ikibura ni ugushyira hamwe, no guhamya ingamba z'ukuri zo guhindura imikorere idindiza, hagashakwa uburyo bushya butuma buri wese abona ikimutunga, agasigura n'ibyo ahahira abandi.

Nyamara ibyo byose ntibyashoboka hari impagarara. Ikiindiza ibihugu by'Afrika cya mbere ni umutekano muke. Ntawakora ashyizeho umwete atizeye ko ibyo avunikira azabitunga.

Abanyafurika bakwiye kurandura ibintu byose bitera imidugararo: intambara zishingira kw'irondakoko, ubwambuzi bukandamiza rubanda bishingira kuri ruswa n'ubundi buryo bwose bwo gushaka indonke witwaza ko urusha undi amaboko. Indwara na zo zibuza Abanyafurika amahoro: uretse kubatera intege nke no kubambura ubuzima, zibabuza no kugera ku majyambere; no kutizera ejo hazaza bikababuza gukora. Abanyamakuru bashatse gutesha urugendo rwa Papa agaciro batinda ku byo yahamije by'uko gukoresha agakingirizo atari wo muti w'ibanze wo kurwanya SIDA. Papa yumvishije abashatse kumutega amatwi ko igikwiye ari umutima uharanira kubaho, umuntu akemera kwifata ngo hato ishyano ritamugwirira, akarikururira n'abandi. Uburyo bw'ingenzi bwo kurwanya SIDA ni ukuvugurura umuco, buri muntu agashakira undi icyamuha ubuzima burambye akirinda icyashobora kubuhutaza cyose. Ikindi ni ukwita ku bafite ibibazo, bakagaragarizwa urukundo rw'ukuri. Hakwiye kandi n'ubutwari bwo kwigomwa no gutsinda icyagirira undi nabi cyose. Mbere ya byose rero kuvugurura uburyo tubona ibintu, imitekerereze yacu n'imyifatire yacu twubaha umubiri wacu n'uwa mugenzi wacu ni byo shingiro ryo kurwanya kiriya cyorezo. Kiliziya ibitangamo umuganda ukomeye mu nyigisho n'ibikorwa binyuranye ku mavuriro yayo.

*Ubukristu bushingiye ku buvandimwe*

Kuwa kane taliki ya 19 Werurwe, mu nzu y'intumwa ya Papa i Yaoundé mu murwa mukuru w'Igihugu cya Kameruni Papa Benedicto wa XVI yagejeje ijamba ku bagize inteke yihariye ya Sinode iziga ibyerekeye Afrika. Byabaye nk'uburyo bwo guteguriza muri Afrika iyo nama izabera i Roma, i Vatican, guhera taliki ya 4 kugeza ku ya 25 Ukwakira muri uyu mwaka wa 2009. Amaze kubashimira uko bateguye neza iyo nama, dore ko ubu basohoye igitabo gikubiyemo imfashanyigisho ku ngingo zizigwa (Instrumentum Laboris) kikaba cyaragejwe ku Bepiskopi bose bo muri Afrika, Papa yanavuze ko Afrika ifite amateka akomeye. Afrika yakiriye Umwana w'Imana igihe ahungiyeye mu Misiri. Yezu ubwe yatagatifuje Afrika igihe imubera ikiramiro. Inkuru nziza yamamaye muri Afrika ya ruguru igitangira gusakazwa kw'isi yose. Inyigisho z'uruhererekane zivuga ko Mutagatifu Mariko umwanditsi w'Ivanjili yageze mu mugi w'Alexandriya mu gihugu cya Misiri. Kuva icyo gihe ubukristu ntibwigeze buzima burundu n'ubwo bwahuye n'ingorane zikomeye. Mu kinyejana cya XVI abanyaburayi bashakaga inzira y'inyanja izabageza mu Buhindi bagejeje Ivanjili ku nkengero z'inyanja zo muri Kongo n'Angola by'ubu. icyakora ntibyarambye; Inkuru nziza yaje gushinga imizi bihamye muri Afrika yo muni y'ubutayu bwa Sahara mu binyejana bya cumi n'icyenda na makumyabiri. Ubu Afrika ifite Abasaserdoti n'Abiyeguriyimana

kavukire benshi, kandi abitegura kwiyegurira Imana bariyongera buri mwaka. Afrika ifite Abalayiki b'ingenzi. Aha yashimye cyane umurimo w'Abakateshisti bunganiye bikomeye ba Misiyoneri, bakabafasha kuvuga Inkuru nziza mu ndimi z'Abanyafurika. N'ubu kandi abo balayiki b'imena baracyafite umwanya ndasimburwa. Ibyo Papa yabishimiye Imana kandi ashima n'Abanyafurika.

Icyakora arasanga ubukristu bukwiye kurushaho kuba umusemburo w'imibereho ikwiranye n'abana b'Imana muri iyi Afrika yugarijwe n'ibibazo, ariko kandi ikaba ifite n'amizero meza.

Yibukije ko Sinode yiga iby'Afrika yabaye muri 1994 yashyize imbere igitekerezo-fatizo cy'uko Kiliziya ari umuryango w'Imana. Anavuga ko insanganya-matsiko ya Sinodi igiye gutangira isongera iby'uko Kiliziya ari umuryango w'Imana. Uwo muryango ukomezwa n'uko muri wo hari ubwiyunge, ubutabera n'amahoro. Konsili yabereye i Vaticani ubwa kabiri ihamya ko "Muri Kristu, Kiliziya ari nk'Isakaramentu, aribyo kuvuga ikimenyetso ndetse n'inzira y'ubumwe bushyitse abantu bagirana n'Imana n'ubwo bene muntu basangiye"(LG.I).

Kugira rero ngo ibyo bishoboke Kiliziya igomba kuba umuryango w'abantu biyunze n'Imana kandi no hagati yabo bafite ubwo bwiyunge. Ibigezeho niho yashobora kugirira akamaro iyi si yuzuyemo impagarara, intambara n'inzangano.

Papa yavuze ko ibyagiye bibera muri Afrika by'amahano, nka jenocide, ubwicanyi n'intambara bikwiye kudukwitura tugaharanira ko bitazongera kubaho. Ntawe ubyungukiramo, ahubwo biduheza mu butindi bw'inzara n'ubundi bukene butuma duhora dusabiriza.

Papa aravugaga ati: "Ubwo muri Kristu tugize umuryango umwe, tukaba dusangiye ubuzima, amaraso amwe ya Kristu akaba atemba mu ngingo zacu, bikatugira nyine abana b'Imana, umuryango w'Imana, inzangano ntizari zikwiye kuzongera kubaho, akarengane n'intambara ntibizasubire hagati y'abavandimwe"(O.RFn°12 du 24 Mars2009).

Papa yibukije ko Kardinali Bernardin Gantin, Umunyafurika wakomokaga mu Gihugu cya Benin, yari yarifuje muri 1988 ko habaho "théologie de la fraternité, bishaka kuvuga gusobanura iyobokamana uherye k'ubuvandimwe, bukaba ishingiro ry'ibitekerezo (cfr O.RFn°15 du 12 Avril 1988).

Papa yarakomeje ati umenya Cardinal Gantin yaribukaga ibyanditswe n'undi Munyafurika wa kera cyane mu ntangiriro y'ikinyejana cya kane witwaga Lactance wanditse ngo: "umurimo wa mbere w'ubutabera ni ukwemera ko umuntu wese ari umuvandimwe. Kuko mu by'ukuri ubwo ari Imana imwe yaturemye, kandi tukaba twarabyawe na Yo ku buryo bumwe, itugenera ubutungane n'ubuzima bw'iteka, ntawashidikanya ko duhujwe n'isano y'ubuvandimwe. Utemera iyo sano ari mu cyaha"(Epitomé des Institutions Divines, 54, 4-5 SC 335, P.210).

Kuri twe abakristu ba Diyosezi ya Nyundo iyi mvugo ntidutunguye. Sinodi ya Diyosezi yacu yadufashije kumva iriya sano y'ubuvandimwe bw'abana b'Imana. Isano muri Kristu idusumbira iy'amaraso. Ni isano y'ubugingo, itazagira ikiyikura. Ni isano itanga amahoro. Ni isano iha buri wese imbaraga zo gukora no kuba ingirakamaro aho ari hose. Ni yo yaduteye gufata wa muhigo duhuriraho w'uko : « Ubukristu bugomba kutubyarira ubuvandimwe nyabwo twarabiyemeje ».

Abagatolika bo muri Afurika barangamiye iyi Sinodi y'Abepiskopi. Noneho si nka ya yindi twakoze muri Diyosezi zacu, bitaga ko ari Sinodi idasanzwe. Muribuka ko twe twayikoreye no mu miryango-remezo ibivuyemo bigashyikirizwa inteko ya Sinodi mu rwego rwa Diyosezi. Sinodi Papa yari yaje kurarikira Abepiskopi ni urwego ruhanitse : ihuza Abepiskopi babitorewe. Hasanzwe Sinodi y'Abepiskopi yiga ingingo bateganiye, bayigira Kiliziya yose, nk'uko kuva ku italiki ya 5 kugeza ku ya 26 z'Ukwakira 2008 i Roma habaye inama ya Sinodi y'Abepiskopi yari ifite iyi nsanganyamatsiko : « Ijambo ry'Imana mu buzima n'ubutumwa bwa Kiliziya ».

Habaho na Sinodi y'Abepiskopi igenerwa gutekereza ku nsanganyamatsiko yabigenewe ariko ibyo bigaho babirebera umugabane uyu n'uuyu w'isi. Hagiye habaho Sinodi y'Abepiskopi igenewe Aziya, igenewe Uburayi bityo. Ni nk'uko hagiye kubaho ubwa kabiri ihuriro rya Sinodi y'Abepiskopi rigenewe Afurika. Inshingano iyo nama yahawe kwigaho ni iyi : « Kiliziya muri

Afurika iharanira ubwiyunge, ubutabera n'amahoro ». « Muri umunyu w'isi... muri urumuri rw'isi »(Mt5,13-14).

Twabonye ko Papa yaje kurarikira Abepiskopi bo muri Afurika gushishikariza abakristu gusabira iyo nama, yabahaye n'igitabo gikubiyemo ibizigwa. Iyo nama irangiye imyanzuro yayo bayishyikiriza Papa, akaba ariwe utegura uko izatangarizwa abantu bose.

Umushumba wa Diyosezi ya Nyundo yatumye abapadiri ba Diyosezi bose bari bateraniye mu nama ku itariki ya 6 n'iyi 7 Gicurasi 2009, gushishikariza abakirisitu gusabira iriya Sinodi y'Abepiskopi. Mu kwezi kwa Nzeri hasigaye nyine ukwezi ngo iyo Sinodi itangire, tuzajya tuvuga buri muni isengesho ryo gusabira Kiliziya, ku itariki ya 4.10.2009 umunsi izatangira hazavugwa Missa yo gusengera iyo Sinodi no ku cyumweru kindi kuri 25.10 ku muni wo kuyisoza, dusabe ngo imyanzuro yayo izavugurure ubukristu muri Afrika.

Urugendo rwa Papa nk'uko mubyumvise rwari rugenewe Afurika yose, tuzirikane ibyo yadukanguriye : abakristu tube umusemburo w'Afrika ijya mbere, Afrika izira inzara, amacakubiri, intambara n'ubukene. Twumve ko tuzabyigezaho dushyize hamwe, aho kuvuga ngo tuzabihabwa n'abandi. Maze kandi tunamenye ko Kristu wadupfiriye, akazuka, akaba ari muzima abana natwe yatugize abavandimwe. Ubuvandimwe bwacu ni imbaraga zizatugeza heza muri ubu buzima, na heza hashyitse mu buzima bw'iteka.

Padiri Fabiyani RWAKAREKE

**UBWIYUNGE NI UBURENGANZIRA N'INSHINGANO KURI BURI WESE**  
(Igice cya gatatu)

**Intambwe ya gatatu : KWIYUNGA N'ABANDI**

Iyo hagize igituma abantu bavuga ku bwiyunge, igihita cyumvikana ni ukwiyunga n'abandi. Birumvikana kandi kuko ikibaye cyose kigaragarira mu mubano, cyaba ikiwunoza cyangwa ikiwangiza. Gusa rero nk'uko twabivuze mu nimeru zibanziriza iyi, *kwiyunga n'Imana* no *kwiyunga nawe ubwawe*, ni intambwe ebyiri za ngombwa, zituma umuntu ashobora kugorora cyangwa kugarura umubano hagati ye n'uwamuhemukiye, cyangwa uwo yahemukiye.

Impamvu ari ngombwa kubiharaho n'ubwo abantu dukunze kubyirengagiza cyangwa kubyibagirwa, ni uko kwiyunga ari ugusubiza ibintu mu buryo. Ni ugutanga icyiza cyari cyarabuze. Urumva rero ko uwari warabuze Imana, na we akibura, ntacyo afite cyo gutanga. N'iyi yakigira, ariko yaburiye ku Mana no kuri we ubwe, urumva ko bitamworohera kubabarira kuzageza nibura kuri za nshuro ndwi Petero yisabiraga Yezu.

Niyo mpamvu rero ubwiyunge nyabwo ari ubushingiye ku mbabazi. Uwamenye Imana kugeza ubwo yumvise ko agomba kubona nka Yo ; akimenya kugeza ubwo yumva ko icyo yifuzako abandi bamugirira, ari cyo na we agomba kubagirira (Mt 7,12), imbere y'inabi, ikimutanga imbere ni impuhwe. Kugira impuhwe ntibimubaza na gato kubabazwa n'ibibi yagiriwe, ari nabyo Petero yahereyeho abwira Yezu ati : « Nyagasani, uwo tuva inda imwe nancumuraho, nzamubabarire kangaha ? nzageza ku nshuro ndwi ? Aha yashakaga kwereka Yezu ko gutanga imbabazi ari byo, ariko ko kwihanganira inabi bigomba kugira aho bigarukira ! Yezu agiye kumusubiza, aramubwira ati : “Sinkubwiye kugeza kuri karindwi, ahubwo kuri mirongo irindwi karindwi ”(Mat 18,21-22 ). Mu yandi magambo, Yezu aramwereka ko natanga imbabazi kugeza ku nshuro magana ane mirongo icyenda, azaba yaramaze kumva ko kurangwa n'impuhwe n'imbabazi bizamuhingutsa ku yindi myumvire y'ubuzima, igirwa n'abiyemeza kwiyunga n'Imana kandi bakiyunga na bo ubwabo kugira ngo babeho barangwa n'ineza haba mu bihe byiza cyangwa mu bikomeye.

Nimube abanyampuhwe nk'uko So wo mu ijuru ari umunyampuhwe.

Aya ni amagambo Yezu ubwe atubwira, atwereka ko kugira impuhwe ari ugutora umuco wo mu ijuru, na We ubwe akesha Se ari we Data. Kubabarira uwaguhemukiye rero, ni no kwemera kudakoresha intwari nk'iz'uwo muhemu; naho ubundi muba mubaye abahemu babiri. Ni uguhagarika icyo gihemu wirinda kumuhora ibyaha bye nk'uko Data wo mu ijuru ataduhora ibyaha byacu. Aya magambo tuyasubiramo buri muni mu isengesho rya “Dawe uri mu ijuru”. Kutamuhora ibyaha bye, nta kindi bigamije kitari ukumukangura ngo abone ko yibeshye abone ko nta nyungu n'imwe iva mukugira nabi. Uko kutitura inabi abayitugiriye, mu by'ukuri ni byo twita Ubucunguzi. Ukuducungura kwa Yezu utararangwagaho icyaha, ni uko kwemera kwikorera ibyaha by'abagome, we ari umwere: “Utigeze arangwaho icyaha, Imana yamugize impongano y'ibyaha, kugira ngo muri We duhinduke abatunganiye Imana” ( 2 Kor 5,21).

Nawe rero iyo ubabariye uwaguhemukiye uba ukoze igikorwa cy'ubucunguzi kuko umwenda w'inabi yari kukwishyura uwumuvanaho; ahubwo ukamuha impano yari yarabuze ari yo twita IMPUHWE.

Kubabarira rero ni ugukora nk'Imana yo yatubabariye muri Kristu, ikaba itakitubaraho ibicumuro byacu: “Uko biri kose, Imana ni yo yiyunze n'abantu bose muri Kristu, ntiyaba ikibabaraho ibicumuro byabo ( 2 Kor 5,19) ikaba ari yo mpamvu Uwemera ko Imana ari Inyampuhwe

n'Inyambabazi aba ahagarariye Kristu agashingwa n'ubutumwa bwo kunga abantu na Yo (2 Kor 5,19-20).

Gusa rero hari abumva ko gutanga no gusaba imbabazi ari ubugwari; abandi bakabibonamo kutumva uburemere bw'icyaha cyakozwe.

Aha ni ukwibeshya kuko burya **imbabazi zigirira akamaro mbere na mbere uwazitanze**. Kuko aba yikuyeho uburemere bw'inabi yagiriwe, aho gukomeza kuyitaho no kuyitekereza, agahitamo kwita gusa ku cyamuha amahoro kikayaha n'uwamuhemukiye.

Buri wese azi ukuntu inabi ibitse mu mutima ariyo iryana kurusha ibindi byose. Iyo utaratanga imbabazi uba ugitsimbaraye ku nabi ikurimo, bamwe bikabatera igishuko cyo kwihorera ngo barebe ko byaborohereza; hari n'ababinanirwa babyifuzaga, kuko nta n'itegeko rishyigikira ukwihorera, ryaba iry'Imana cyangwa iry'igihugu. Abandi babika inabi bikabaviramo gucika intege no kwiheba; bakaba baheranwa n'umujinya n'agahinda, kandi ntawuyobewe ko agahinda, katica kagira mubi. Niyo mpamvu rero kubika inabi mu mutima nta mumaro, icyiza ari ugutanga imbabazi, ugatura mbere umutwari wari ukurimo, ukaba unafashije uwaguhemukiye gutura uwe, umufasha kubona inabi yamuranze, no kumenya kuyivamo, na we akarangwa n'ineza, ubimuhayemo urugero.

Kubabarira kandi si ukwibagirwa igihemu cyangwa inabi wagiriwe kuko ibyakubayeho byose, ibyiza n'ibibi byagize icyo bikwigisha biguha amasomo utari ufite mu buzima. Ni ubunararibonye bushya byaguhaye. Kubyibagirwa rero byaba ari ubupfayongo kuko byaba ari nko kwibagirwa umwarimu wawe. Kubabarira rero si ukwibagirwa ahubwo ni ukwibuka neza. Ni ugusukura imyibukire yawe (Purification de la memoire). Kwibuka nabi ni bya bindi twavuze byo kugumana inabi ku mutima, ntikuvemo kandi ntigire n'icyiza ikuzanira; naho kwibuka neza, aribyo twise gusukura imyibukire (purification de la memoire), ni uguhindura akababaro mo imbaraga zo gukira ugendeye kuri cya kindi Yezu yavuze ngo "ishavu ryanyu nzarihinduramo ibyishimo" (Yh16, 20). Nta kindi uba ugiriye usibye kuba wibonera ko uwaguhemukiye atangana n'ikosa rye kuko n'Imana ubwayo itamutererana burundu. Mbese ni ukoza akabaye icwende, kagacya, kagashira n'umunuko. Ubwo rero wamwibuka wibuka n'ibibi yakugiriye, aho kumuvuma ukamusabira; ushishikajwe n'uko yahinduka, uhangana n'icyabimuteye aho guhangana na we ubwe.

Uwagiriwe impuhwe, cyangwa uwababariwe burya ni na we wumva neza uburemere bw'inabi yakoze, kuko apima urukundo agaragarijwe ku nabi yamuranze akaba ari bwo yumva ko yatanye kuko aba yeretswe icyo yabuze cyagombaga kumuranga. Ntawakwiyibagiza ariko ko hariho abica amatwi, cyangwa abanangira umutima bagatsimbarara ku mafuti yabo, aho kwicisha bugufi ngo basabe imbabazi z'ibyaha bakoze, ari ku Mana no kubo babikoreye.

Nanone rero nk'uko twabivuze k'uwahemukiye; n'uwahemutse na we asabwa gutera za ntambwe ebyiri za mbere zo *kwiyinga n'Imana* no *kwiyinga na we ubwe*, kugira ngo yumve neza uburemere bw'ibyo yakoze ahemukira mugenzi we, yige n'uburyo bwo kubivamo.

Ikindi umuntu yakongeraho aha ngaha, ni uko udakeneye ko babanza kugusaba imbabazi kugira ngo ubone kuzitanga. Kuko twabonye ko uwa mbere bigirira akamaro, ari wowe uzitanze. None se utegereje ko aza kugusaba imbabazi ntazaze, wumva ko iyo nabi wabitse uzayitura ryari? Wowe tanga imbabazi naho uwahemutse yazigusaba cyangwa atazigusaba, icy'ingenzi ni uko azabona ko ufite ubushake bwo kumuha icyo umurusha, we yabuze ahemuka, akazumva atyo ko inabi itubaka isenya, hubaka ineza n'ubwumvikane.

Umuntu yavuga rero ko kubabarira atari ubugwari, ahubwo ari ubutwari bukomeye. Ni ubutwari kuko ari uguhora urwana na kamere yihutira guhora no kwihimura, ishaka kwitura inabi. Nibyo Yezu yasanze mu mategeko y'abayahudi, aho iryinyo ryahorerwaga irindi; ijisho rigahorerwa irindi, mbese ikibi wakoze kikagukorerwa cyangwa kigakorerwa uwawe; yasanze rero ibyo bidaca



urugomo n'amahane, abakangurira indi myumvire, abibutsa kudashyamirana n'umugiranabi, abigisha gukunda abanzi no gusabira ababatoteza (Mat 5,38-39.43-44). Ni inshingano itoroshye adusaba, niyo mpamvu twavuze ko ari ubutwari bukomeye. Yabiduhayemo urugero igihe yemera kubambwa ku musaraba azira ubusa; ariko aho kubasabira umuvumo no kubihimuraho kuko bitari kumunanira, abasabira imbabazi kuri Se agira ati: "Bababarire Dawe kuko batazi icyo bakora" (Lc 23, 34).

Ngaho rero wowe wari waratinye gutanga imbabazi kuko wumva uwaguhemukiye akurimo umwenda ukomeye agomba kukwishyura, wumuharire ugiriye ubuntu n'impuhwe uwaducunguye yatugaragarije kandi natwe akadusaba kumukurikiza. Ibuka kandi ko nawe utari miseke igoroye. N'ubwo waba wumva ko uwaguhemukiye ibye biremereye kurusha ibyawe, girira ko icyaha cyose cyaba igito cyangwa ikiremereye bidashimisha Imana, ahubwo niwumva uciye akenge kumurusha, umukangurire icyo umurusha cyafasha abantu kurushaho kunoza imibanire. Igihe Sawuli yahigaga Dawudi ngo amwice, Dawudi yamusanze ku musozi ahantu h'ubutayu aryamye kandi asinziriyeye, icumu rye rishinze ku butaka hafi y'umusego we. Umugaragu wa Dawudi aramubwira ati: "Uyu muni Imana yashyize umwanzi wawe mu biganza byawe. None rero, reka mutere icumu rimwe rizira irya kabiri, maze mubambe ku butaka. Nuko Dawudi aramusubiza ati: "Sigaho kumwica! Yungamo ati: "Uhoraho azabimpore nindamuka nkojeje ikiganza ku wo yiyimikiye. None rero fata ririya cumu riri ku musego we n'igicuma cy'amazi maze twigendere. Barabifata barigendera koko. Nyuma rero aho Sawuli abimenyeye, yemera ko Dawudi amurusha imbaraga, maze araturika ararira, hanyuma abwira Dawudi ati: " Urandusha ubutungane kuko wangiriye neza, kandi jye narakugiriye nabi. Ariko wowe uyu muni wagaragariye ubuntu wangiriye: ubwo Uhoraho yakunyeguriraga, maze ntunyice. Mbese iyo umuntu ahuye n'umwanzi we, aramureka akigendera mu mahoro? Uhoraho azakwiture ineza wangiriye uyu muni." (1 Sam 24,17-20 ) uru ni urugero rw'imbaraga z'imbabazi. Nawe wari waratinye gusaba imbabazi abo wahemukiye, ibuka ko iyo nabi yakuranye igukururira umuvumo aho kuguhesha umugisha, igihe cyose utarabyicuza ngo bikubabaze, wumve ko bitari bikwiye, ubyemere kandi ubisabire imbabazi nka Sawuli.

Uzisabye ntuzihabwe ntiwazira icyo, nibura washimirwa ko wakoze icyo wagombaga gukora, upfa kuba ubikoze ubikuye ku mutima.

Muri make rero kwiyunga n'abandi ni uguha ineza rugari ikabyara impuhwe n'imbabazi mu mutima, bituma abagiranye ikibazo bongera kwita ku cyo bapfana cyari cyarabuze, bakarenga icyo bapfuye, bityo ineza igahabwa intebe kandi igashimangirwa; inabi igasenyera kandi ikamaganwa. Nanone ngo inshuti ebyiri zatemberaga mu butayu, mu gihe bajyaga impaka umwe akubita undi urushyi. Ukubiswe arazindara ariko ntiyagira icyo avuga, ahubwo yandika mu musenyi ati: "Uyu muni inkoramutima yanjye yankubise urushyi." Barakomeza baragenda, baza kugera ku cyuzi, biyemeza kujyamo ngo boge. Wa wundi wari wakubiswe urushyi agiye kurohama mugenzi we aramusingira ntiyarohama. Amaze gutsimbuka, yandika ku rutare ati: "Uyu muni inkoramutima yanjye yankijije kurohama". Wa wundi wari wakubise mugenzi we urushyi kandi agatuma atarohama, aramubaza ati: "Kuki nakugiriye nabi ukabyandika ku musenyi, nakugirira neza ukabyandika ku rutare?" Undi aramusubiza ati: " Umuntu najya atugirira nabi, tujye tubyandika ku musenyi, aho umuyaga w'imbabazi ushobora kubisibanganya. Ariko nihagira utugirira neza, tubisharage ku rutare aho umuyaga udashobora kubihanagura."

Tumenye rero kwandika ku musenyi inabi twagiriye, tukamenya no kwandika ku rutare ineza tweretswe, nibwo twagera ku bwiyunge nyakuri tudatiza umurindi inabi twagiriye, ahubwo duhangira inzira ineza twaremewe.

Padiri Emmanuel NYAMPATSI  
Padiri Mukuru wa Paruwasi GISENYI

## BIKIRA MARIYA ATWIGISHA IKI MU MWAKA WA LITURUJIYA ( Igice cya kabiri)

### Intangiriro

Mu nyandiko iheruka twarebeye hamwe icyo Umubyeyi Mariya atwigisha mu gihe cya Adiventi na Noheli cyane cyane mu buryo bwo kumva no gutekereza, gufata umwanzuro mu buzima bwacu bwa gikristu, kwiyoroshya no gukunda, gushimira Imana ibyiza itugirira cyane ko Bikira Mariya atubereye urugero rw'ukwemera. Iyo nyigisho nziza ya Bikira Mariya niyo, ariko tubanje kwibukiranya Umwaka wa Liturujiya icyo ari cyo n'uburyo uteye.

### Umwaka wa Liturujiya

Umwaka usanzwe ugira iminsi 365 cyangwa 366, mu byumweru 52. Umwaka wa Liturujiya na wo rero ungana n'umwaka usanzwe, ariko ntutangirira cyangwa ngo urangirire rimwe n'umwaka usanzwe. Umwaka wa Liturujiya utangira mu mpera z'ukwezi kwa cumi na kumwe, ugatangirwa n'igihe cy'Adiventi, ugasozwa n'umunsi wa Kristu Umwami.

#### Liturujiya ni iki ?

Mu gitabo cy'inyigisho za Kiliziya Gatolika, mu gika cyayo cya 1069, batubwira ko mbere na mbere Liturujiya bivuga « igikorwa rusange gikorewe imbaga ». Naho mu ruhererekane rw'ubukristu, Liturujiya bivuga ko imbaga y'Imana igira uruhare mu gikorwa cyayo cyo gukiza abantu. Ni muri Liturujiya ikorerwa muri Kiliziya, hamwe na Kiliziya, hifashishijwe iyo Kiliziya, Kristu ubwe, Umucunguzi n'Umuherezabitambo Mukuru akomeza igikorwa cyo gucungura abantu. (Catéchisme de l'Eglise Catholique n°1069).

Muri rusange, liturujiya ni uburyo bwo gusingiza Imana, bigakorwa mu buryo bw'Amasakaramentu uko ari arindwi, ndetse no mu buryo bw'amasengesho, Misa, umuhimbazo, indirimbo, bureviyari (bréviaire), mu buryo bw'imyiteguro n'isuku, ndetse no guhereza n'ibindi byose bifasha umuryango w'Imana kwitagatifuza.

Umwaka wa Liturujiya udufasha rero gusenga no gucengera amabanga yo gucungurwa kwacu, tukazirikana ku rukundo rw'Imana mu byanditswe bitagatifu, bigabanyijemo ibice bitatu. Nibyo bita umwaka A, B, na C.

#### Intondeke y'Umwaka wa Liturujiya

A. Igihe cy'Adiventi na Noheli.

● *Igihe cy'Adiventi (Avent)* : kimara ibyumweru bine. Igihe cy'Adiventi kitwibutsa gutegereza Umukiza, twigomwa, twambaza, twihana kugira ngo avukire mu mitima yacu.

Icyumweru cya 1 cy'Adiventi kirangwa n'imvugo ishushanya kandi ihishura ibihe bya nyuma: amaza n'ihindukira rya Nyagasani.

Icyumweru cya 2 n'icya gatatu, ibyanditswe bitagatifu bigaruka cyane kuri Yohani Batista integuza ya Yezu Kristu: “Habayeho umugabo woherejwe n'Imana izina rye rikaba Yohani, yazanwe no guhamya iby'urwo rumuri kugira ngo bese bamukeshe kwemera”(Yh1,6).

Icyumweru cya gatatu ariko gifite umwihariko wo kuba icyumweru cy'ibyishimo (gaudete): kwishimira ko Nyagasani ari hafi kuza rwagati muri twe.

Naho icyumweru cya 4, kigaruka cyane ku ivuka rya Yezu, bikagaragazwa n'Umumalayika usura Yozefu na Mariya: “Igihe yari akibitekerezaho, Umumalayika wa Nyagasani amubonekera mu nzizi aramubwira ati: “Yozefu, Mwana wa Dawidi witinya kuzana Umugeni wawe Mariya, kuko yasamyeye ku bwa Roho Mutagatifu (Mt1,20).

Muri iki gihe cy'Adiventi ni bwo twizihiza kandi Umunsi Mukuru wa Bikira Mariya utarasamanywe icyaha, uba ku ya 8 Ukubozza. Bikira Mariya rero ashushanya Yeruzalemu yishimiye kubona umukiro maze igatera akamo k'ibyishimo igira iti: “Ndasabagizwa n'ibyishimo muri

Uhoraho, umutima wanjye uhimbajwe n’Imana yanjye, kuko yanyambitse umwambaro w’umukiro, akansesuraho umwitero w’ubutungane. “Nishimye nk’umukwe utamirije ikamba rye cyangwa umugeni witatse imirimbo ye”(Iz.61,10).

● *Igihe cya Noheli* : Noheli itwibutsa ivuka rya Yezu, Emanueli: Imana turi kumwe. “Koko Umwana yatuvukiye twahawe umuhungu, ubutegetsu bumuri mu bitugu. Ahawe izina: Umujyanama w’agatangaza, Imana idahangarwa, Umubyeyi iteka, Umwami w’amahoro”(Iz19,5). Igihe cya Noheli kandi kigizwe n’uruherekane rw’iminsi mikuru. Iyo minsi mikuru ni iyi: Umunsi Mukuru w’Umuryango Mutagatifu, Umunsi Mukuru w’Ubunani (Nouvel an), Umunsi Mukuru w’Ukwigaragaza kwa Nyagasani (Epiphanie du Seigneur) uba ku cyumweru cya kabiri gikurikira Umunsi Mukuru wa Noheli.

## B. icyiciro cya 1 cy’igihe gisanzwe.

Gitangira ku cyumweru cya 3, Noheli ibaye, ari nawo munsi Mukuru wa Batisimu ya Nyagasani, kikarangira ku wa 3 w’ivu (Mercredi des cendres).

## C. Igihe cy’igisibo gitegura Pasika

● *Igisibo gitangira ku wa gatatu w’ivu*. Twibuka iminsi 40 n’amajoro 40 Yezu yamaze mu butayu asenga, atarya kandi atanywa. Bityo umukristu ukoze igisibo neza akarangwa n’imigenzo myiza yo gusiba, gusenga, kwihana n’ibikorwa by’urukundo ( le jeûne, la prière, la pénitence et les oeuvres de charité). Kimara ibyumweru 5, icyumweru cya 6 n’icyumweru cya Mashami (Dimanche de rameaux), ari nacyo gitangira icyumweru gitagatifu.

● *Igihe cya Pasika (Temps Pascal)*: gitangira mu gitaramo gitagatifu cya Pasika (kigatangirwa n’icyishongoro: Imana nisingizwe mu ijuru) kikageza ku munsi mukuru wa Pentekositi. Igihe cya Pasika kigizwe muri rusange n’ibyumweru 7; icyumweru cya 1, ni umunsi wa Pasika nyirizina, icya 2, ni icyumweru cy’impuhwe z’Imana.

Naho icyumweru cya 4, ni icyo kuzirikana ku ihamagarwa (journée des vocations). Ku wa 4 w’icyumweru cya 6 ( ni ukuvuga ku munsi wa 40 nyuma ya Pasika)ni umunsi w’Asensiyu (ascension): Yezu asubira mu ijuru. Uyu munsi kandi ushobora kwizihizwa ku cyumweru cya 7, iyo bitashobotse ko wizihizwa ku wa 4.

Icyumweru gikurikiyeho ni umunsi mukuru wa Pentekositi: Roho Mutagatifu amanukira mu mitima y’intumwa. Wizihizwa ku munsi wa 50 Pasika ibaye.

## D. Igice cya 2 cy’igihe gisanzwe:

Iki cyiciro, gitangira nyuma y’umunsi wa Pentekositi, tugakomereza kuri cya cyiciro cya 1 twahagaritse mbere y’igisibo, tukazagisoza ku munsi wa Kristu Umwami. Muri iki gihe Kiliziya yizihiza iminsi mikuru ikurikira :

1. Umunsi mukuru w’Ubutatu butagatifu
2. Umunsi mukuru w’Isakramentu ritagatifu
3. Umunsi mukuru w’Umutima mutagatifu wa Yezu, n’Umutima utagira inenge wa Bikira Mariya.
- 4.24/06 : Umunsi w’ukuvuka kwa Yohani Batisita
- 5.27/06 : Abatagatifu Petero na Pawulo
- 6.06/08 : Yezu yihindura ukundi
- 7.15/08 : Bikira Mariya apfa akajyanwa mu ijuru
- 8.14/09 : Ikuzwa ry’Umusaraba
- 9.01/11 : Umunsi mukuru w’Abatagatifu bose
- 10.02/11: Gusabira abakristu bose bapfuye
- 11.09/11: Itahwa rya Kiliziya ya Laterani
- 12.21/11: Bikira Mariya aturwa mu Hekaru.

### **Bikira Mariya atwigisha iki mu gihe gisanzwe**

Aha ngaha turavuga icyiciro cya mbere cy'igihe gisanzwe. Igihe gisanzwe ariko, ntibivuga ko umukristu akora ibyo yishakiye, cyangwa ngo ashire imbaraga nke mu bukristu bwe. Si igihe cyo kubaho nka bimwe abantu bikinira bagira bati: "ni ibisanzwe nka Misa ya mbere". Ahubwo ni igihe cyo gushyira mu bikorwa no kugaragaza ko ibyo twavomye mu bihe bikomeye (temps forts) byatugiriye akamaro. Ni igihe cyo gukorana urugendo rw'ubukristu n'Umucunguzi wacu: Imana rwose n'Umuntu rwose, ariko kandi tukabifashwamo n'Umubyeyi Bikira Mariya. Ku bw'ibyo rero; twibuka kandi tukarangamira Kristu twisunze Bikira Mariya, tukamenya Kristu tunyuze kuri Bikira Mariya, tukigana uburere, uburezi n'umuco Yezu akomora ku babyeyi be, bityo tukishushanya na We, tukamwambaza kandi tukamwamamaza twisunze Bikira Mariya.

#### *1°. Kwibuka no kurangamira Kristu twisunze Bikira Mariya*

Bikira Mariya ashishikaza buri gihe abemera "amayobera" y'Umwana we, akifuzwa ko bayarangamira kugira ngo abagwirize imbaraga zibakiza. Iyo imbaga y'abakristu ivuga Rozari, iba ihuje by'umwihariko na Bikira Mariya wibuka kandi ushengereye Umwana we. Niyo mpamvu imibereho ya Bikira Mariya yaranzwe no kwibuka. Nyamara uko kwibuka si uko mu gihe cyahise gusa na n'ubu birakorwa, tukabigira ibya none ndetse tukabigira ibyacu cyane cyane muri liturujija. Koko rero iby'Imana yakozwe mu binyejana byahise, ntibireba gusa ababibonye icyo gihe, ahubwo ku bw'ineza y'Imana bigera ku bantu bo mu bihe byose. Bityo, iyo tubyibuka tubigiranye ukwemera n'urukundo biduha kwakira ingabire Yezu Kristu yaboneye mu mayobera y'ubuzima, urupfu n'izuka bye.

Inama Nkuru ya Vatikani ya 2, mu nyandiko yayo ku byerekeye liturujija, mu ngingo ya 10; itubwira ko "Liturujija ari igikorwa kirangirizwamo ubutumwa bwa gisaseridoti bwa Kristu n'umurimo musingiza Mana w'abantu, ikaba n'iherezo ry'ibikorwa bya Kiliziya n'isoko ivubukamo imbaraga zayo zose" (Sacrosanctum Concilium n°10). Byongeye kandi niba liturujija ari igikorwa cya Kristu kandi gitanga umukiro, iyo tuvuga Rozari nk'igikorwa cyo kuzirikana kuri Kristu na Bikira Mariya, ni ukurangamira agakiza. Uwo Mubyeyi Mariya ni We wahangaga amaso Kristu, na buri jambo rye rikamubera ubukungu: "yashyinguraga byose mu mutima we akabizirikana" (Lk2,19;51). Bityo rero urwibutso rw'imibereho ya Yezu rwishushanyije mu mutima we, ruramuherekeza mu bihe byose, rukamufasha kuzirikana bundi bushya ibihe bikomeye kandi binyuranye by'ubuzima bw'Umwana we. Nuko rero umwigishwa wa Kristu agomba guhanga amaso uruhanga rwa Kristu, kubona iyobera rye mu buzima busanzwe no mu bubabare bwa kamere muntu ye, kugeza aho ubwiza butagatifu bugaragariye mu Uwazutse agahabwa ikuzo iburyo bwa Se. Uwo ni we Petero, Yakobo na Yohani barangamiye igihe yihinduye ukundi mu maso yabo. (Mt17,2).

#### *2°. Kumenya Kristu tunyuze kuri Bikira Mariya*

Iyo Pawulo Mutagatifu abaza ati: "bakwiyambaza bate rero uwo bataremeye? Bakwemera bate se uwo batarumva? Bamwumva bate ntawamwamamaje? Bamwamamaza bate batatumwe?" (Rm10,14), aba agaragaza ko Kristu ariwe mwigisha w'ukuri, uhishura iby'Imana kandi akabihishurisha imibereho ye. Tugomba kumenya rero ibyo yatwigishije kandi tukamumenya We ubwe: ubuzima bw'iteka ni uko bose bakumenya, wowe Mana nyakuri n'uwo watumye Yezu Kristu (Yh17,). Ninde mwigisha muri urwo rwego waba umuhanga kurusha Bikira Mariya ?

Gutozwa na Bikira Mariya ni ishuri rihamye, kuko mu kutwigisha anaturonkera ingabire nyinshi za Roho Mutagatifu, akatubera n'urugero rutagereranywa rw'ukwemera. Kuri buri yobera ry'Umwana we adutoza kubaza ibibazo bitugeza ku rumuri, nk'uko nawe yabikoze igihe amenyeshwa ko azabyara Umwana w'Imana: "bizashoboka bite ari nta mugabo ngira" (Lk1,). Ibyo bigaherukwa n'ukumvira kurangwa n'ukwemera nk'ukwe igihe agize ati: "Ndi Umuja wa Nyagasani byose bibe uko ubivuze" (Lk1,38). Bityo rero Bikira Mariya atwigisha kumenya Yezu no kugendana na We mu buzima bwacu igihe atubwira nk'abahereza b'i Kana ati: "Icyo ababwira cyose mugikore" (Yh2,5).

3°. *Uburere, uburezi n'umuco tuyobowe na Bikira Mariya.*

Yezu yarerewe i Nazareti mu Galileya mu rugo rwa Yozefu na Mariya. Muri iki gihe hari ababyeyi benshi bigira ntibindeba ku burere, uburezi n'umuco by'abana babo; hari kandi n'abana batacyumvira, batacyubaha ababyeyi babo. Yezu we imico myiza myinshi ayikomora kuri Yozefu na Mariya: igihe Bikira Mariya amubariye i Betelehemu, yahoraga ahanze amaso uruhanga rwe, akamwonsa, akamworosa utwenda, akamuryamisha mu kavure. Rimwe na rimwe akamureba anamwibazaho. Igihe bamutuye Imana mu ngoro bifuzaga ko yakwegurirwa Imana (Lk2,7,48). Bahoraga rwose bita ku buzima bwe: igihe Herodi ashaka kumwica bamuhungishirije mu Misiri; igihe azimiriye i Yeruzalemu basubiye kumushaka. Bamubonye bamubwiranye indoro yuje urukundo: “Mwana wanjye watugenje ute” (Lk2,48). Iyo aba Umubyeyi w'iki gihe aba yaramututse, yaramukubise ndetse akanamwihanangiriza. Bikira Mariya yari afite indoro icengera, ishobora gusesengura ibyihisha mu mutima wa Yezu, kumenya ibitekerezo bye no guhishura icyo yifuzaga nko mu bukwe bw'i Kana (Yh2,5). Nta gushidikanya kandi ko Yezu yabanaga n'ababyeyi be akabafasha buri muni. Nguwo Yezu wumvira, wubaha kandi ushishikajwe no gufasha ababyeyi be; byose akabikesha uburere, uburezi n'umuco ababyeyi be bamutoje.

4°. *Kwishushanya na Kristu twisunze Bikira Mariya.*

Bikira Mariya aba muri Kristu kandi akaberaho Kristu. Bityo, uko umuntu arushaho kwiyegurira Bikira Mariya, ni nako arushaho kwiyegurira Yezu Kristu. Muri Rozari turonka imigenzereze ya gikristu, ishingira ku kurangamira ubudahwema uruhanga rwa Kristu twisunze Bikira Mariya. Tukaganira, kandi tugaharanira gukurikiza urugero rwe rudusaba kwishushanya na We nk'incuti magara. Ubwo bucuti butuma twinjira ku buryo bworoshye mu buzima bwa Kristu, tukagira ibitekerezo nk'ibye.

Ku bw'iyi nzira yo kwishushanya na Kristu dukeshya Rozari, twiragiza by'umwihariko Umubyeyi Mariya, Nyina wa Jambo akaba n'Umubyeyi wa Kiliziya. Bityo, akomeza kubyarira Kiliziya abana, aribo “mubiri” mayobera w'Umwana we. Ibyo abikora igihe adusabira ku Mana ngo turonke imbaraga zidakama za Roho Mutagatifu.

5°. *Kwambaza no kwamamaza Kristu twisunze Bikira Mariya.*

“Musabe muzahabwa, mushakashake muzaronka, mukomange muzakingurirwa” (Mt7,7). Ishingiro ry'ububasha bw'isengesho ni ubugiraneza bw'Imana. Data udukunda, ariko kandi Yezu Kristu utuvugurura na We afite uruhare rutagereranywa We ugira ati: “aho ababiri cyangwa batatu bateraniye banyambaza mba ndi hagati yabo”.

Ku bw'ibyo nyine, Umubyeyi Bikira Mariya aratugoboke kugira ngo ashigikire isengesho Kristu na Roho Mutagatifu bashyira mu mutima wacu. Byongeye kandi burya isengesho rya Kiliziya rya nirishyigikiwe n'irya Bikira Mariya. Ivanjili itugaragariza ku buryo bunoze ububasha bw'ubuvunyi n'ubuvugizi bwa Bikira Mariya, uvuganira abantu kuri Yezu akamubwira ibyo bakeneye: “Nta Divayi bagifite” (Yh2,3); bityo rero igihe tumwiyambaza muri Rozari ntagatifu, Bikira Mariya aba aduhagarariye imbere y'Imana Data yamuhundagajeho ingabire, n'imbere ya Mwana yibariye, asenga hamwe natwe kandi adusabira.

Twakwamamaza dute rero Kristu twisunze Bikira Mariya ?

“Kuko niba wamamarisha umunwa wawe ko Kristu ari Nyagasani uzarokorwa... Umuntu yamamarisha umunwa bikamuha uburokorwe” (Rm10,9-10).

Rozari ni isengesho ikaba n'inzira yo kwamamaza ubutumwa no kubushimangira; muri iyi nzira niho hari inyigisho irangwa n'isengesho ryo gusaba no kurangamira. Iyo nyigisho kandi igamije guhindura umwigishwa nk'uko Kristu abishaka. Koko rero mu kuvuga Rozari harimo iby'ingenzi byose bituma iba isengesho ryo kuzirikana, igihe bihawe agaciro bikwiye. Rozari ya Bikira Mariya ni « incamake y'ivanjili ». Ni yo mpamvu uyivuze azirikana, akayihira agaciro ikwiye, ayironkamo isomo ry'Iyobokamana rikomeye kandi risobanutse neza.

*Umwanzuro*

Inyigisho ya Bikira Mariya mu gihe gisanzwe irarambuye rwose: idukangurira binoze iyobera ry'ukwigira umuntu kw'Imana, maze uko umuntu agenda acengera iryo yobera akaba ari nako yunguka ibitekerezo bihamye mu gushyigikira urugendo rwe rw'ubukristu. icyo gihe umukristu arakura agahamya ibirindiro muri Yezu Kristu, agasagamba rwose, aka ya mbuto ya Sinapisi, ibibwa ari n'ntoya cyane maze ikavamo igiti cy'inganzamarumbo (Mt13,31-32).

Mu gihe gisanzwe rero umukristu wese asabwa gukoresha neza imbaraga aronka mu bihe bikomeye twavuze mu ntangiriro; kugira ngo zimurumbukemo imbuto akesha kwibuka Kristu, kumurangamira no kumumenya by'ukuri, bigatuma amwambaza, akanamwamamaza abikesha kwa kwishushanya na We, yisunze Umubyeyi Bikira Mariya. icyo rero kikaba ikintu cy'ingenzi kiranga umutima wa gikristu n'umugambi w'umwigishwa wo guharanira buri gihe kwishushanya n'Umwigisha we, bityo umukristu akagira amatwara ahuje n'aya Kristu ubwe (Fil 2,5).

Fratri Théoneste NZAYISENGA.

#### Ibitabo byifashishijwe

1. Bibiliya Ntagatifu
2. Cathéchisme de l'Église Catholique, traduit à Bujumbura, Mai 2000.
3. Les 16 documents conciliaires. Constitution sur la liturgie, Montréal-Paris, 1993.
4. Ibaruwa « Rosarium Viriginis Mariae » ya Papa Yohani Pawulo II .
5. Ordo Liturgique, année 2008-2009 (B).
6. Léodegard NIYIGENA, Abato na bo baba abatagatifu, Nyakibanda 2007.

**IJAMBO RYA PADIRI MUKURU WA SEMINARI  
KU MUNSI MUKURU WA MT PIO WA X.**

Nyiricyubahiro Musenyeri, Umushumba wa Diyosezi ya Nyundo,  
Banyacyubahiro Basaserdoti,  
Banyacyubahiro Bihaye Imana,  
Banyacyubahiro Bayobozi mu nzego zitandukanye,  
Bashyitsi bahire namwe basangwa,  
Babyeyi, barimu, barezi, banyeshuri, baseminari.

Twishimiye uyu muni muhire duhimbaza umunsi mukuru wa Mt Pio X. Turashimira Imana uyo yaduhuje uyu muni mu byishimo kandi turabashimira mwe mwese mwaje kwifatanya natwe.

Ubundi umunsi mukuru wa Mt Pio X uba tariki 21/08 muri Kiliziya ku isi hose. Twahisemo kubatumira kuri iyi tariki ya none, kugira ngo dufatanye kwishimira ibyo twagezeho, tunababwire uko duhagaze na gahunda dufite muri ibi bihe biri imbere.

Uyu mwaka dufite abana 190 bafashwa n'abarezi 16 harimo abapadiri 4 n'umufaratiri umwe uri muri stage. Hari n'abandi bakozi bagera kuri 30 batwunganira mu mirimo inyuranye. Mu cyiciro rusange dufite abanyeshuri 123, mu cyiciro cya kabiri: Section Latin Bio Chimie ni 67. Turashimira ubwitange bwa buri wese mu mirimo ashinzwe, umwete n'ubwitange bakorana.

Turashimira Diyosezi ya Nyundo yigomwa byinshi kugira ngo abana bacu bige neza, turashimira Ministeri y'Uburezi idahwema kwita kuri iri shuri yifashishije inzego zayo zose n'Ubuyobozi bwa Leta muri rusange. Turashimira ubufatanye bw'ababyeyi batuba hafi, tukuzuzanya mu guha abana bacu uburere bunozze.

Twiyejeje kudaca intege abo bose batwitangira. Bimwe mu bipimo bigaragaza uko duhagaze ni imitsindire mu bizami bya Leta. Twahize gutsinda 100% ari muri T.C, ari muri Section-Latin Bio-Chimie. Atari ugutsinda gusa, ahubwo gutsindana amanota meza aduhesha ishema mu ruhando rw'andi mashuri mu Rwanda hose.

Intego twihaye turi kuyigeraho. Muri iyi myaka 8 ishize, muri T.C. higeze gutsindwa umwana umwe gusa, naho muri section muri iyi myaka 8, hatsinzwe 2. Guhera muri 2005 ho ni 100% nsa nsa!

\*Muri T.C.2006 : Batsinze bose twabaye 2è/486(amashuri) : moyenne 7.12

\*Muri T.C.2007 : Batsinze bose twabaye 4è/535(amashuri) : moyenne 6.49

Umwana wacu HATEGEKIMANA Innocent aba 17è/46.724 n'amanota 9,3. Nko mu isomo rya Chimie : 17/23 bafite A.

\*Muri Section Latin Bio Chimie : 2007 batsinze bose 33/33.

Mu mashuri yose yakozze ibizami bisoza amashuri yisumbuye uko ari 281 turi aba 11, naho mu mashuri afite ishami rya Bio Chimie turi aba 4 mu Rwanda. TWAGIRAYEZU Gaspard wagize 9,3 ni uwa mbere mu Rwanda mu banyeshuri bigaga Bio Chimie, MASOMO Pio wagize 9,1 ni uwa kabiri mu Rwanda. Iryo shuri ryagize 5 distinctions, 30/33 babonye bourses muri université za Leta. Batatu bageze muri Etats-Unis d'Amérique. Barindwi bumvise ijwi ribahamagarira kwegurira ubuzima bwabo Imana baba abapadiri, ejo bagiye gutangira mu Iseminari Nkuru ya Rutongo. Mu basaserdoti 7 Diyosezi yacu yungutse muri uyu mwaka, 6 banyuze mu Iseminari yacu. Ni nde utabyishimira ?

Ibyo byiza twashoboye kugeraho tubikesha ubwitange bw'abarezi baba hafi y'abanyeshuri, abanyeshuri bazi icyabazanye na gahunda y'urugo ituma nta munota n'umwe upfa ubusa. Gahunda zose ziba ziteguwe neza kandi zihuriza mu kubaka umuntu muzima, umunyarwanda ufite ubwenge, imbaraga zo guhangana n'ibibazo biriho muri iki gihe : turasenga, tukiga, tugakora imirimo y'amaboko, tugakina, tukidagadura. Abarimu bakora muri Départements : Latin , Musique ,

Sciences exactes, Langues modernes et Sciences humaines, Sports et Loisirs. Usibye amasomo, abana bagira byinshi bibahuza kandi buri huriro rifite umurezi urishinzwe :

\* hari imiryango y'urubyiruko 9 : action catholique et groupes de prières : Xavéri ,...

\* hari za Clubs 7 : Anti-Sida, Unité et Réconciliation,...

\* hari amakipe : Foot, Basket, Volley, Hand, Karaté, Acrobatie, ahagaze neza.

Ibyo byose bihuza abana nyuma y'amasomo tubikomeyeho kuko naryo ari ishuri bigiramo kubana, kubahana, gukundana. Bituma badata igihe mu bidafite akamaro cyangwa ibyasenya imibanire myiza y'abantu, nk'amacakubiri n'ingengabitekerezo ya jenocide n'izindi ngeso mbi.

Turifuza guhora ku isonga mu gutanga uburere bwiza bushingiye ku bukristu, ubumenyi buhanitse n'umuco utajorwa. Formation intégrale de l'homme : développer tout l'homme : intelligence – cœur, corps – âme, liberté – responsabilité, autonomie – solidarité. (Byose bikajyana ntakiryamiye ikindi).

- Dufite intego yo gukomeza guharanira kuba indatwa mu guharanira ubuzima bwiza bw'abana bacu, twihatira isuku no kwita ku bidukikije. Tuzabigeraho tubiharaniye kuko dufite inzitizi nyinshi muri urwo rwego. Sebeya idutera iyo imvura yaguye ari nyinshi, canalisations z'amazi zitameze neza, igisenge cy'amazu yacu gishaje cyane gikenewe gusimburwa, amazi ya Aquavirunga n'amashanyarazi ya Electrogaz bihenze cyane, ubukene bw'ababyeyi batabona n'uduke tubasaba ngo bunganire Diyosezi, ibiciro by'ibintu bizamuka buri muni, urugo rutazitiye neza, muri iyi minsi abajura batumereye nabi (ndetse no muri iri joro)...Ibyo byose ntibiduca tege.

-Dufite intego yo gufasha abana bacu gukomeza gutsinda neza, bese bakabona amanota abahesha bourse mu mashuri makuru ya Leta. Ugiye muri Seminari Nkuru akaba ari uhisemo atari uhunga ubushomeri, akaba afite ubuhanga butuma yiga neza Philosophie na Théologie n'andi masomo ateganyijwe mu iseminari, afite ukwemera, ubwitonzi bubakiraho.

Ntituzatezuka gutsinda 100%. Tuzakomeza guteza imbere ICT. Ministère y'uburezi yaduhaye mudasobwa 10, incuti zo muri Luxembourg ziduha 10, abarimu twishyize hamwe twigondera internet iduhenze. Nidufashe mu kunoza imyigishirize, n'imyigire y'abanyeshuri, tube abashakashatsi. Muri urwo rwego dufite inzitizi za entretien z'imashini zihenze. Twihatire indimi zikoreshwa mu myigire, tuzikeneke : Ikilatini, Icyongereza, Igifaransa.

- Tuzakomeza gahunda yo gutanga uburere bunozwe, ubupfura, no gutegurira u Rwanda rwacu, Kiliziya yacu abasore batojwe kubaha Imana, kuyisenga no kuyiha umwanya w'ibanze mu buzima bwabo, abanyarwanda biyubashye, bubahana, barenze ibintu byose bibatandukanya ahubwo bubakira ku bibahuza mu bwuzuzanye, abasore bumvise ibyiza dukeshya ubumwe, ubwuzuzanye, umurimo ukoze neza, gukunda Kiliziya n'Igihugu. Izo gahunda muzazidushyigikiremo buri muntu mu rwego arimo n'ubushobozi afite.

Mutagatifu Pio X duhimbaza uyu muni azakomeza atubere umuvugizi n'umurinzi. Akiri muto yabonye igikwiriye n'igihesha agaciro ubuzima bwe, aba umwana uzi icyo ashaka kandi akagiharaniye atizigama, mu bihe bikomeye yabaye intwari arwanira Kiliziya ishyaka. Nabere urugero abana barererwa hano n'abarezi babarera, abere urugero abatuye uru rugo rwacu n'incuti zarwo.

Nyiricyubahiro Musenyeri, Banyacyubahiro mwese, bashyitsi bahire, namwe basangwa, turangije tubashimira mwebwe mwese mwaje kwifatanya natwe kuri uyu muni w'ibyishimo. Mukomeze mugubwe neza mu i seminari yacu.

Umuni mwiza wa Mt Pio X. Mugire amahoro y'Imana.

Padiri Vincent HAROLIMANA  
Umuyobozi wa Seminari.



## INKERA Y'ISHYA

### Dominique NGIRABANYIGINYA

1. Aniverseri nziza Mwiru mukuru cyane.

Impundu z'urwungirane Mushumba  
uribagije Nyundo.

2. Bupfura bwanyuze Abagoyi, Gitabo cyuzuye

Ivanjiri, akira ibi birori biyegayega  
nk'inyanja.

3. Reka wogezwe n'amashuri Rebero ry'Iyaduhanze.

Seminari nziza zingiro ry'umusozo  
Ibaye isata y'urwego. Ikuzo ryayo ntiricurama,  
inkike zayo ni uburezi,  
imbariro zayo ni ubudahigwa.

4. Si ukuriranya amagambo, imigabo yawe  
ntidohoka, na Kompanyi yose y'Abayezuwiti yabishinga :  
« Ntuzi kwica indangano, uri intwari iheta ibigembe ».

5. Iyo uwakubuye akuraze ikintu, nawe ukishyura abo wahetse.

6. Nguwo umurimo uhanze amaso, niwakwicara ngo bikunde.

7. Komerera ! Iyo usenga irakumva, itatse ibambe,

kandi irusha ihinda ingoga.

8. Eccellenza Monsignore Aleksii Habiyambere,

Sacerdote magno, metropolita di Kayanza :  
i nostri sentiti ringraziamenti per la sua gradita  
visita. Tanti auguri per anniversario  
suo undicesimo di vita vescovile.  
Sempre avanti.

9. Hora uratwa mu bitaramo uri intwari itabaririzwa.

Ubwo wamamajwe n'ubumanzi komeza  
wûsire impundu muri Nyundo yuje urugwiro.  
Hora ushira ubwoba muri rurindi Manzi badakorera.  
Wahanganywe ubugabo bushyitse nta nganizi  
mwicarana. Ucisha ukubiri n'umuco  
ukuremye aba yirandura imizi akuma.  
Ni ugutema ishami yicayeho rikamugwana  
igiti kicyemye.

10. Twebwe Intambiramihigo zawe tuzira

guhuna no kuba nk'icyagumbwa mu murima.  
Miryango ihuje intego ikaba itaramiye  
Rudasumbwa, ngo amata abahaye murayahorane  
ntimukarare amata mu Rwanda. Cyo  
nimuzose umurishyo urenge turare inkera y'ishya.

N.B: Iyi ndirimbo, abaseminari bo ku Nyundo bayiririmbiye Nyiricyubahiro Musenyeri Alexis Habiyambere, kuwa gatandatu tariki ya 04.10.2008, bishimira imyaka 11 Musenyeri amaze ayoborana ubushishozi Diyosezi ya Nyundo, kandi bamwifuriza ishya n'ihirwe. Tariki ya 04.10.2008, Seminari Nto yo ku Nyundo yahimbazaga umunsi mukuru wa Mutagatifu Piyo wa 10, Umurinzi n'Umuwugizi wa Seminari.

## GATEMERI GATATSE

Mubyeyi muzira guhandwa  
Piyo mubyeyi dukunda  
Seminari iseruka ikeye  
Cyusa cyiza serukana ishimwe  
5.Tega yombi wumve ishimwe

Ntarahirwa ngo ngusange  
Nta mutuzo nagiraga  
Nta mutekano nacuraga  
Nacuragiraga bucucu  
10.Nkanicara ahadakeye

Bitotsi bidatokoza  
Bushyuhe bubikira  
Ubukonje bukubana  
Mafu afutsa umutima  
15.Umubabaro utwugarije

Gatemberi gatatse  
Imana yatatse ikamba  
Ruhimbi rudahirima  
Rukaduhaza ubuzira cyena  
20.Ngushimire ngire kenshi

Ibyiza byinshi dutunze  
Wadutuye dutuje iwawe  
Ukadutaka umubiri wose  
Ukaduhaza urungana byose  
25.Ngushimire uko ngusanga

Udusanganiza urugwiro  
Ukadusekera bisesuye  
Tukagusangana urukundo  
Rukondeye urukumbuzi  
30.Ngushimire ugashire.

Ngushimire ibyo wampaye  
Nawe Musenyeri dukunda  
Kenyera kenyera neza  
Ukindikize izo nkindi  
35.Ukingure udakinga.

Iteto utoshye ni ubutore  
Ngaho ku bw'ubushake  
Tega yombi wumve ishimwe

Nguture ituro ridatuba  
40.Nawe Komayombi urabikwiye.

Cyusa cy'abatabazi  
Cytatire cya Mutabazi  
Rwemo ruzira icyena  
Rwema yatatse ikamba  
45.Kenyera komeza nibwo butwari.

Ntore izira ubusembwa  
Ntore igira ubutore  
Ngabo ihorana ingoga  
Shyanga rishyamba intashyo  
50.Amashyo yose naguturwe.

Icyo ntagukinze ni icyo  
Singukinze irenga  
Irengero rigana ingoma  
Ungana ingoma igihumbi  
55.Uhumbagije iyo mu mpinga.

Ngushimire mutonesha  
Ubutoni buhora butoshye  
Udutonesha udatinda  
Ukadutura ibitunganye  
60.Ukatunganya Iyaduhanze.

Nguharire mubyeyi  
Ibigwi biruta ibindi  
Ngutake zitarake  
Nguture ituro ridatuba  
65.Ngutanage amatakwe.

Ngutamirize irihe kamba  
Ngukenyeze iyihe nkindi  
Inkundura y'iminsi itaraza  
Ngo inzimye insibe amaso  
70.Ntagusigiye ishema ukwiye.

Ngutake ngutanage  
Nkuvuge nkwivugire by'ingabo  
Wowe ngabo ingana iyambyaye  
Ngabe ugabirwe ihirwe  
75.Amagara yanjye ataraganzwa.

Ndagana mu iyi ngando

Ngenda ngana urukundo  
Ndagana mu iyi nganzo  
Ngenda ngana urugendo  
80.Ngo nshime nyir'urukundo.

Waradukunze mico y'abeza  
Turagukunda kagire ibyiza  
None rero Micomyiza  
Ngiryo ishimwe ry'abeza  
85.Mvanye aheza iyo mu ihezwa.

Ngutuye ntatubya mubyeyi  
Iteto rizira gutuba  
Ryo guhora uri itara  
Ukaba urumuri rutazima  
90.Ukaba isoko y'ubuzima.

Iteto uhora uduhunda  
Urukundo uhora udukunda  
Rukwiye ingando y'Iseminari  
Bigirumwami yahaye Umwami  
95.Piyo iteka ahora ayirinze.

Isumo isuma ubutoni  
Yansamiye mu nzira ngenda  
Seminari turagushima  
Gahore uratwa i Rwanda  
100.Gahore ushimwa amagana.

Ubwuzu buzira ubwoba  
Nuje nkimara kuza  
Nkagusangana isari inshaka  
Iyi insanganiza urukundo  
105.Nzakundwa ubuzima bwose.

Impuhwe zizira guhunga  
Nuje nkigera Nyundo  
Ukadusiga bizira umwera  
Byerekanye urukundo  
110.Wadukunze bizira umwaku.

Urukundo rw'ineza  
Runeza abazira ineza  
Rwanshimbye inshyimbo  
Runshyingura mu ishyamba  
115.Runshingira impumbya.

Byinshi nkibyo nkindi  
Nkindikira ndi wese  
Nkanesa nagaba impano  
Nari kugabirwa kera kose  
120. Iyo mpigu igabwa impinge.

Seminari saso y'ubutore  
Seruka neza nkuko usanzwe  
Urerere u Rwanda n'Iyaduhanze  
Ibyo ukora byose ni intsinzi  
125.Hose uranze ubaye ubukombe.

Si igikabyo ngo nikuze  
Si indirimbo inogeye amatwi  
Si n'impanuro y'ibyahise  
Ni ukuguhamya cyusa  
130.Cyusa umuhigo i Rwanda.

Amatwara yawe atwara bose  
Kuba amasimbi iyo mu gikombe  
Gutsindisha benshi beza  
Kurera neza bizira umwaku  
135.Ugahira uhanze i Rwanda.

Simpakana impamo i Rwanda  
Uwakubaza abatakuzi  
Akakubaza abakuzi  
Abakunzi bangana abagenzi  
140.Ngenda ngana iyo nganzo.

Ntacyo mbona ngutaka  
Ngutatse iteto utoshye  
N'abatakuzi i Rwanda  
Babaze Piyo mubyeyi mwiza  
145.Bigirumwami komerwa yombi.

Seminari seruka neza  
Nguture ishimwe ga nyagushimwa  
Piyo mbyeyi ivumera  
Aho wicaye ijabiro uganje  
150.Ganza nganze niwo munani.

Piyo mubyeyi mwiza  
Waragijwe benshi beza  
Byinshi byiza nk'ibyo

Serukana ishema ushamaje  
155.Kimbagira gitwari.

Watubereye itara ryaka  
Wabaye umutako utatse  
Wambitswe ikamba ryera  
Twera tugana abera  
160.Piyo nyamibwa nshima.

Shimwa ga nyagushimwa  
Twagushimye kuba umutako  
Tuba umutako utatse i Rwanda  
Aho unyuze hose ni seminari  
165.Ngiyo intero i Rwanda.

Ndabyina nsohoka neza  
Ndacunda ikimuri neza  
Ndagenza inzira ndagiye  
Nzagaruka ubishatse  
170.KOMAYOMBI niba ushaka.

Fait par KOMAYOMBI  
Christophe Colomb

## **TWIZIHIJE UMUNSI MUKURU W'ISHURI RYITIRIWE MUTAGATIFU MATAYO RY'I BUSASAMANA**

Intangiriro

Ku italiki ya 26/10/2008, Urwunge rw'Amashuri Mutagatifu Matayo ryo muri Paruwasi ya Busasamana ryakoze, ku nshuro ya mbere kuva ryongeye gufungura imiryango nyuma y'intambara, Ibirori byo kwizihiza Umunsi Mukuru wa Mutagatifu Matayo ryitiriwe, rinatanga ku mugaragaro Impamyabumenyi zo mu rwego A2 mu Binyabuzima n'Ubutabire ku bana baharangirije mu mwaka w'Amashuri 2007 ; ari nabo mfura muri iryo shami (1<sup>ère</sup> promotion).

Urwunge rw'Amashuri Mutagatifu Matayo ni rimwe mu Bigo 15 by'amashuri yisumbuye bya Kiliziya Gatolika muri Diyosezi ya Nyundo.

Iryo Shuri riri mu Karere ka Rubavu, Umurenge wa Busasamana, riri nko ku birometero 7 uvuye ku muhanda munini wa Kaburimbo, aho bakunze kwita ku Kabali ; ni umuhanda utagendwamo n'ibinyabiziga byinshi ; ibihaboneka cyane ni amagare, ibicugutu, ubundi ukabona imodoka imwe n'imwe muziba zaje gupakira ibirayi cyangwa imboga zinyuranye kuko ako Karere kera cyane. Hari ubwo haboneka na twa « Moto ».

Ni Ishuri riri mu Karere gafite amateka yihariye kubera intambara y'abacengezi nyuma ya Jenocide. Nyamara ntibibuza ko Ishuri riganwa n'abanyeshuri baturutse mu mpande z'igihugu.

### 1. UKO UMUNSI MUKURU WAGENZE

1. Ibirori byabimburiwe n'igitambo cy'Ukaristiya cyatangiyeye saa ine za mu gitondo kiyobowe na Nyiricyubahiro Musenyeri Alexis HABIYAMBERE, Umushumba wa Diyosezi ya Nyundo.

Mu nyigisho nziza Umwepiskopi yatanze uwo munsi, dore ko muri icyo Paruwasi ari nabwo bari bizihije Umunsi Mpuzamahanga w'Iyogezabutumwa, yibanze ku butumwa bukomeye Umurezi afite ku bana arera. Yagize ati : « Abarimu ni babe abahamya ba Kristu wazutse ku bigo byabo. Abadiregiteri b'Ibigo Gatolika bamenye ko bahagarariye Kiliziya Gatolika (bumve ko bahagarariye Umwepiskopi wa Diyosezi muri ibyo Bigo) imyitwarire yabo yoye gutukisha Kiliziya. Nibatange urugero rwiza, kuko utatanga uburere bwiza utihereyeho ; ntawe utanga icyo adafite. Nimurerera Kiliziya muzaba murerera n'igihugu.

Uko Umwepiskopi ari umugaragu w'Ijambo ry'Imana ndetse akaba yaripfira; namwe nimube abagaragu baryo mubo murera, mujye mwemera kubabara kubera bo. Umusaraba wa Kristu tuwukomereho.

Missa ihumuje twagiye ku Ishuri ahagombaga gukomereza imyidagaduro y'abanyeshuri n'amagambo anyuranye.

2. Mu ijamba ry'Umuyobozi w'Urwunge rw'amashuri rwa Mutagatifu Matayo yibanze ku mateka atari make yaranze icyo Kigo kuva gitangiye mu mwaka w'1989 kugeza ubu.

**AMATEKA Y'URWUNGE RW'AMASHURI MUTAGATIFU MATAYO.**

1989 – 1990 : Ishuri ryatangiyeye ari ENT (Ecole Normale Technique)

1990 – Avril 1994 : ENP Busasamana (Génocide itangiye barahagaze)

29/05/1995 – 1996 : Economie

1997 – 1998 : Ntabwo bize kubera intambara y'abacengezi

Ishuri ryongeye gutangira neza mu mwaka w'1999, ritangira ari icyiciro rusange, mu mwaka w'2005 ryemererwa gutangiza Ishami ry'**Ibinyabuzima n'Ubutabire** none ubu rishoboye gutanga Diplômes zaryo za mbere. Kandi igishimishije ni uburyo bashoboye gutsinda ari benshi aribwo bwa mbere bakoze Ikizamini cya Leta, nyuma y'izo ngorane zose. Abanyeshuri 37/40 baratsinze ; muri abo 22 babona bourses zo kujya kwiga mu Mashuri Makuru.

Ikindi Umuyobozi yongeyeho ni ingorane bahura nazo muri iki gihe :

-Kuba batagira imodoka ibafasha kujyana abana kwa muganga no kubahahira

-Laboratoire idafite ibikoresho bihagije kandi bafite section Biochimie

-Inzu yo kuraramo ku bakobwa

3. Umwarimu wavuze mu izina rya bagenzi be, yagaragaje ibiranga umurezi mu bo arera ari byo:

- Ubwitange

- Kurwanya ingengabitekerezo ya Génocide

- Kwitabira gahunda za Leta

- Guhinduka no gukora ku buryo buhuje n'iterambere

- Kugisha inama

-Kurangwa n'imikoranire myiza na bagenzi be

Nawe kandi yagarutse ku bibazo ikigo cyabo gihura nabyo, aribyo by'ibi:

-Inzu yo kuraramo ku bakobwa

-Laboratoire

-Imodoka yabafasha mu guhaha no kugeza abanyeshuri kwa muganga

-Kutagendana n'igihe nko kuba nta Koranabuhanga rigezweho (Computer na Internet) abana babona

-Bakeneye Ishami rya Maths Physique

-Bakeneye Bibliothèque

-Bakeneye amahugurwa aba kenshi cyane cyane mu Ndimu

-Abarimu barifuza ko ababyeyi bakwiga ku kibazo cyo kwongera agahimbaza musyi kuko ikigo cyabo kiri mu bikiri hasi cyane ku kibazo cy'agahimbaza musyi.

4. Umunyeshuri uhagarariye abandi mu izina rya bagenzi be yashimiye ubwitange bw'abarezi babo aboneraho no kubashimira ibyo babagejejeho, uburere babatoza bugashimangira ubuvandimwe hagati yabo. Ibyo bose bahuriye ndetse n'abarezi babo n'ibibazo bafite byavuzwe haruguru.

5. Mu ijamba ryavuzwe n'uhagarariye Ubuyobozi bwa Leta yabimbuje indamutso y'Ubukire (tubukoreye, dufatanije tuzabugeraho kandi vuba); yashimiye abarezi ba Collège St Mathieu uburyo bitangira abo barera bigaragarira mu buryo batsinze n'ubwo inzitizi zitari zibuze.

- Yababwiye ko ubukire bagize intego ntawabugeraho atajijutse.

- Abizeza ko Ubuyobozi bwa Leta bubari hafi kugira ngo babafashe mu byo babashoborera byose.

- Asaba abana kuzakomeza kurangwa n'ikinyabupfura, ni byo bizahesha isura nziza ikigo cyabo.

Ijamba ryo gusozza ibirori by'uwo muni ryavuzwe na Nyiricyubahiro Musenyeri Alexis

Habiyambere, Umwepiskopi wa Diyosezi ya Nyundo.

Mu ijamba risoza ibirori by'uwo muni yagaragaje ibyishimo afite kubera ibyo Ishuri Mutagatifu Matayo rimaze kugeraho ubu; kuba ritaraciwe intege n'ibibazo byinshi ryahuye na byo, muri ako Karere katahwemye kubamo ibitero by'abacengenzi.

Yibukije abari aho ko gutsinda neza ari intego y'amashuri Gatolika. Abarimu baharanire gutsindisha kandi neza. Abana babone za bourses.

Abarezi n'abarerwa barangwe na Discipline; abana bahabwe ubumenyi mu burere bwiza.

Urubwiruko rwishora mu biyobyabwenge barumenye ruhanwe kuko rwiroga rukaroga bagenzi babo rutaretse n'igihugu; bagapfa bahagaze. Mwirinde kwishora mu busambanyi bizatuma nimwubaka muzabaho mu budahemuka.

Abana bitoze umuco mwiza wo kubana kivandimwe; abarezi babarinde amacakubiri.

*Isura y'Ishuri Gatolika iteye itya:*

-Kubana no kubahana buri wese mu kwemera kwe.

-Amadini aterwa n'amateka y'umuntu ku giti cye n'uko yavutse; buri wese rero abyubahirwe.

Yashoje ijambo rye asaba cyane cyane abarangije, kuzaba abagabo bakunda igihugu, bakunda Kiliziya, bagira icyo bungura aho bagiyeye.

Mugende mukomeze mwigye, mutsinde neza, kandi mube inyangamugayo.

## UMWANZURO

-Umunsi mukuru w'Ishuri nk'uyu ni ingirakamaro cyane.

-Uhurizahamwe abanyeshuri, abayobozi babo abigisha n'ababyeyi, ubuyobozi bwa Kiliziya n'ubwa Leta maze uwo murimo basangiye bakawurebera hamwe.

-Ku ishuri bishyigikira cyane ubufatanye kandi bigatuma abana bagaragaza impano bafite.

-Ku munsi nk'uyu abantu basubiza amaso inyuma bakareba amateka yabo kandi bagasuzuma n'imikorere, baganisha ku gufata ingamba.

-Ni cyo cyatumye Umwepiskopi wacu asaba ko amashuri Gatolika yose yajya agira Umunsi nk'uyu buri mwaka kandi ugakorwa mu gihe cyegereye Umunsi w'Umutagatifu ishuri ryaragijwe.

-Asigaye ataramutoranya arasabwa kubyihutisha.

Umwanditsi : BAZAMURANGA Janvier

## KU MUNSI WA YUBILE YABO

« Muzatangaze mu gihugu cyanyu ko uwo mwaka wa 50 ari mutagatifu kandi ukaba uwo guhimbaza ukubohorwa kw'abaturage » *Levi 25,10*

Hari kuwa gitandatu tariki ya 23/08/2008, ubwo Abasaveri baturutse hirya no hino muri Paruwasi zigize Diyosezi ya Nyundo bahuriraga ku Nyundo mu rwego rwo kwizihiza Yubile y'imyaka 50 Umuryango w'Abasaveri umaze ugeze muri Diyosezi ya Nyundo.

Nk'uko tubisanga mu musemburo w'ubusabane n° 8, urup 26-29, Umuryango w'Abasaveri wageze muri Diyosezi ya Nyundo mu mwaka wa 1956, utangizwa na Nyakwigendera Musenyeri Ludoviko Gasore muri Paruwasi ya Nyundo. Kuva icyo gihe wakwiye hirya no hino mu maparuwasi agize Diyosezi ya Nyundo, wiganza cyane mu mashuri abanza n'ayisumbuye ya Kiliziya Gatolika. Abayobozi bihaye Imana (Aumôniers) banyuranye bakomeje kuwushyigikira, cyane cyane mu bikorwa birebana n'ingando (amahugurwa), imyiherezo, amasura y'abayobozi ku rwego rwa Diyosezi, n'ibindi.

Abandi biyeguriye Imana nk'abafurere n'ababikira mu miryango inyuranye nabo bagize uruhare rukomeye mu gushyigikira abasaveri cyane cyane mu mashuri abanza n'ayisumbuye mu bigo bayoboraga cyangwa bakoragamo.

Nubwo génocide yo mu 1994 yahungabanyije byinshi mu byari bimaze kugerwaho, n'abanyamuryango benshi bakahatakariza ubuzima, Umuryango w'Abasaveri ntiwazimye, ahubwo abasigaye bakomeje kwisuganya none bageze kuri Yubile y'Imyaka 50 Umuryango umaze utangiye ku Nyundo.

Twakwibutsa ko Umuryango w'Abasaveri washingiwe i Bukavu muri Repubulika iharanira Démokarasi ya Congo na Padiri Georges DEFOUR (Père Blanc) afatanyije n'umuforomo Augustin ZAGABE ku ya 7/9/1952. Watangiye ugizwe ahanini n'urubyiruko rw'abahungu n'abakobwa bari mu ntera eshatu arizo *Abishimye, Intwari n'Abanyeshyaka*. Mu 1958 hashyizweho Urunana rw'Abasaveri bakuru arirwo UXA (Union des Xavéris Adultes). Muri uyu mwaka wa 2008, UXA imaze imyaka 50 itangiye.

Mu nyigisho yagejeje ku bakristu mu gitambo cya Misa no mu ijamba yavuze igihe cy'ibirori, Musenyeri Alexis Habiyambere, Umushumba wa Diyosezi ya Nyundo yagejeje impanuro ku basaveri bari bitabiriye Yubile. Izo mpanuro nizo turibandaho muri iyi nyandiko.

*Ibikubiye mu nyigisho yo mu gitambo cya Misa*

Mu nyigisho yageneye abakristu mu gitambo cya Misa y'uwo muni, Umushumba wa Diyosezi ya Nyundo yagize ati''Mu gihe duhimbaza Yubile y'imyaka mirongo itanu Umuryango w'Abasaveri umaze ugeze muri Diyosezi yacu dukwiye gushimira Imana ibyiza uwo muryango wagezeho kandi abawugize bagasubiza amaso inyuma kugira ngo babone uko bafata ingamba zo kurushaho kujya mbere.

Duhereye ku ntego y'abasaveri igira iti : *urukundo iteka* dukwiye kureba uko abantu barushaho gukwiza urukundo nyarwo. Hari abantu bakiboshye mu mitima yabo kubera kubura urukundo. Abo mubafashe kubohoka maze nabo bumve ko ari abana b'Imana bakaba abavandimwe banyu. Iyo imitima iboshye abantu ntacyo bashobora kugeraho. Urukundo dusabwa kugira tugomba kuruhuza n'urwo Kristu yadukunze. Kristu niwe rugero rw'urukundo tugomba kukundana''.

Musenyeri yakomeje yerekana ingero zigaragaza urukundo Kristu yadukunze. Yagize ati :''Igihe Yezu aremye Isakramentu ry'Ukaristiya yarushijeho kutwegera. Kumuhabwa kenshi kandi neza ni byiza''. Yakomeje agira ati''Wavuga ko ukunda Kristu ute utamwegera ahubwo umuhunga ?

Ikindi kigaragaza urukundo Kristu yadukunze ni igihe yogeje ibirenge by'intumwa ze. Kubona Kristu (Imana) apfukama, akoza ibirenge by'intumwa ze(abantu), yerekanye ko umuntu afite agaciro gakomeye. Yabahaye urugero bagomba gukurikiza kandi abishimangira igihe agize



ati : « Ibyo nkoze namwe mujye mubigirirana ». Kubera iyo mpamvu dukwiye guharanira kuba abagaragu b’Imana twitangira abandi.

Kristu yongeye kutugaragariza urukundo igihe yari ku musaraba. icyo gihe yagize ati : « Nta rukundo rwaruta urw’Umuntu wemera guhara amagara ye kubera inshuti ze. Kristu yadukunze yemera kudupfira kandi akababarira ibyaha byacu.

Na none igihe Yezu aturaze Umubyeyi we Bikira Mariya nabwo yatweretse ko adukunda byimazeyo.

Musenyeri yavuze ko mu mibanire yacu, urwo rukundo Kristu yatugaragarije mu ngero zinyuranye rukwiye guhora ruturanga. Yakomeje agira ati’’ Hari abantu bagana Imana mu bihe bisanzwe, ikibazo cyaza bati Imana imaze iki? Mu bihe bikomeye niho tugomba kugaragaza urukundo kurushaho. N’umusaveri agomba kugaragara mu bihe bikomeye. Nka Kristu tugomba gukunda kugeza ku musaraba. Benshi ntibagira urukundo rugera ku musaraba.’’

Musenyeri yakomeje agira ati’’Muri ibi bihe hari abantu benshi bihebye, batizeye ejo hazaza. Hari abantu benshi batazi kwishima icyo ari cyo. Abantu bahora bijimye.’’ Yagize ati’’ Mwebwe abasaveri bato, abo bantu muzabamarira iki? Mwe abasaver b’abanyesuri, abo bantu muzabamarira iki? Mwe abasaveri bakuru abo bantu muzabamarira ik?’’ Yakomeje agira ati’’tugomba kwagura amarembo y’imitima yacu. Ibyo bizagaragarira mu kwitangira abandi tumurikiwe n’ivanjiri, tumurikiwe n’urukundo Kristu yadukunze’’. Yagize ati’’hari igihe abantu bireba, bagira bati njye niteze imbere, ngire ubukungu’’. Ati’’ni ngombwa kureba n’abandi, tugaharanira gukora ibyagirira abandi akamaro’’. Musenyeri yakomeje agira ati’’ nitube rero koko Umusemburo w’urukundo, tumenye ko hanze aha huzuye inzangano zituruka ku mateka twanyuzemo’’. Ati’’aho hantu muhajye, muhabibe urukundo, muhageze urukundo Kristu yadukunze’’.

Mu gusoza inyigisho ye, Musenyeri yagize ati’’ uyu mwaka wa Yubile nubabere umwaka mutagatifu, umwaka wo kwibohoza, umwaka wo kugaragaza ubuvandimwe. Muhawe ubutumwa bwo kuba umusemburo w’urukundo muri uru Rwanda. Kubigeraho ariko bisaba kubanza kwibohora. Birashoboka ariko kuko intego y’abasaveri ijyanye n’icyo ubukristu budusaba. Banza ube umukristu nibwo uzaba umusaveri w’Ukuri’’.

Yakomeje agira ati’’Mushyire imbere urukundo nyarukundo, urukundo rutari rwa rundi rukanisha mu kwishimisha. Hari byinshi biganisha mu kwishimisha byamamazwa hirya no hino. Mwe murwane intambara yo kwamamaza urukundo nyarwo. Murwane iyo ntambara mwugurura amarembo y’imitima yanyu’’. Yakomeje agira ati’’Mbifurije Yubile nziza mwese. Uyu mwaka wa Yubile uzababere umwaka mutagatifu, mu mitima yanyu, mu bitekerezo no mu buzima bwanyu. Uzababere umwaka wo kurwana urugamba rwo kwerekana urukundo rw’ukuri icyo ari cyo’’. Yarangije aragiza abari aho Bikira Mariya Umubyeyi w’Abakene.

*Ibikubiye mu ijambo Umushumba wa Diyosezi ya Nyundo yagejeje ku bari mu birori byakurikiye igitambo cya Misa.*

Mu ijambo yagejeje ku bari bitabiriye Yubile, Umushumba wa Diyosezi ya Nyundo yabanje gushimira abari baturutse hirya no hino muri Diyosezi ya Nyundo ndetse n’abaturutse ahandi baje muri Yubile y’imyaka mirongo itanu umuryango w’abasaveri umaze ugeze muri Diyosezi ya Nyundo. Yagize ati’’Umuryango w’abasaveri urimo urubwiruko, abakuze, abasaserdoti, n’abandi bihaye Imana muri rusange’’. Ati’’ ibyo byose dukwiye kubishimira Imana. Udashima Imana ni utabona ibyo Imana imukorera n’ibyo ikorera abandi ibiminyujijeho’’.

Yakomeje avuga ko ari ngombwa kuvugurura Imiryango y’Agisiyo Gatolika kuko biri mu myanzuro ya Sinodi. Yibukije ko ku ya 15/8/2008, kuri Crête Congo-Nil yabwiye abakristu ko kuba ubukristu n’uburere mu ngo bigenda bikendera ari ikibazo kitureba. Yagize ati ‘’ese niba abana babuze uburere bwa ngombwa mu rugo , ku ishuri niho bazabubonera?’’ Ati’’ ko mu

mashuri abanza, ayisumbuye ndetse na za kaminuza ubukristu n'uburere bigenda bikendera, mubona abana bacu bazavamo abarezi n'abayobozi bameze bate?"

Yakomeje avuga ko ari muri urwo rwego Diyosezi ya Nyundo yifuza ko buri mukristu (yaba urubiruko cyangwa se abakuru) yagira umuryango w'Agisiyo gatolika abazwamo. Yavuze ko abadashaka kugira umuryango w'Agisiyo Gatolika babarizwamo ari abadashaka kwitanga. Yagize ati"mu mashuri yacu abanyeshuri bitabire kujya mu miryango y'Agisiyo Gatolika". Yatanze urugero agira ati"nk'umuseminari utagira umuryango w'Agisiyo Gatolika abarizwamo yazitangira abandi ate?" Ati" kenshi n'abayobozi bo mu nzego zo hejuru baba bararerewe mu miryango y'Agisiyo Gatolika". Yagaragaje ko mu miryango y'Agisiyo Gatolika tuhigira gusabana kandi tukahatoretzwa n'Iyobokamana. Yavuze kandi ko Imiryango y'Agisiyo Gatolika ihuza abanyarwanda, yifuza ko tushyirira imbaraga dushingiye cyane cyane ku byabaye muri uru Rwanda mu 1994. Yakomeje avuga ko Imiryango y'Agisiyo Gatolika ari impano zinyuranye muri Kiliziya akaba ari yo mpamvu mu myanzuro ya Sinodi harimo gutoza abakristu kwitabira Imiryango y'Agisiyo Gatolika. Yibukije ariko ko atari byiza ko umuntu yajya mu miryango myinshi, ahubwo ashimangira ko umuntu yajya mu muryango umwe ariko akawubamo umugabo.

*Icyo Umushumba wa Diyosezi ya Nyundo asaba abasaserdoti n'abiyeguriyimana muri rusange.*

Umushumba wa Diyosezi ya Nyundo yavuze ko hari abapadiri benshi babaye mu muryango w'Abasaveri, avuga ko bitumvikana ukuntu Umuryango w'abasaveri wasubira inyuma kandi abo bose muri za Paruwasi barimo. Yifuje kandi ko n'abandi bihaye Imana babaye abasaveri aho bari baba hafi umuryango w'Abasaveri. Muri rusange yifuje ko abapadiri n'abandi bihaye Imana aho bari bafata iya mbere mu gushyigikira imiryango babayemo, babegera bakabagira inama. Kubera ko iyo ari Pastorale ikomeye mu bihe tugezemo, Museyeri yavuze ko Diyosezi idashaka abantu b'indorezezi, ko ahubwo ishaka abantu bitangira abandi bamamaza urukundo. Yakomeje avuga ko uko twamamazaga urukundo mbere ya 1994 atari ko dukwiye gukomeza kubikora ubu. Yavuze ko mu 1994 abantu babonye ko hari ibikwiye kuvugururwa mu kwamamaza urukundo. Yakomeje avuga ko abantu bakwiye kureba uko bakwamamaza kurushaho ubutumwa bw'urukundo, ubutumwa bw'ubusabane. Umushumba wa Diyosezi ya Nyundo yifuje ko Yubile yabera abasaveri umwanya wo kuvugurura umuryango. Yubile yabaye mu rwego rwa Diyosezi, izakurikirwa no kuyizihiza mu rwego rw'akarere(doyenné) na Paruwasi.

Musenyeri yibukije ko mu miryangoremezo yose hatangiye amatsinda y'abana bato; asaba ko abasaveri bagira uruhare mu kwita kuri ayo matsinda y'abana iwabo mu miryangoremezo. Yifuje rwose ko abasaveri baba umusemburo w'ubuvandimwe iwabo mu miryangoremezo.

Musenyeri Habiyambere Alexis, Umushumba wa Diyosezi ya Nyundo yashoje ijamba rye yifuriza abasaveri gukomeza kugira Umunsi mwiza.

Ibyo birori byitabiwe n'abashyitsi banyuranye, harimo abasaserdoti baje baherekeje abasaveri baturutse hirya no hino muri Paruwasi za Diyosezi ya Nyundo, abahagarariye Bureau National y'abasaveri bayobowe na MUKAKABERA Dativa (cheftaine nationale), abahagarariye Bureau diocésain y'Abasaveri mu Ruhengeri baherekejwe na Padiri Aumônier wabo, n'abandi.

Muri ibyo birori herekanywe imikino inyuranye yashimishije abantu ariko uwashimishije kurushaho n'umukino wari uyobowe na Padiri Gilbert Ntirandekura na Padiri Gaspard Kanzira. Twababwirako ko aba bapadiri babaye abasaveri kuva bakiri bato, by'umwihariko Padiri Gilbert akaba ari Aumônier w'abasaveri muri Zone pastorale ya Kibuye, akaba n'umunyamabanga mukuru wa Komisiyo y'Abepiskopi Gatolika ishinze urubiruko.

MUSEBYUKUNDI Didace

## CHORALE MAGNIFICAT YA PAROISSE MUHORORO YASUYE PAROISSE YA GISENYI

Kuva kera na kare, umuco mwiza wo gusurana wahozeho, kandi n'ubu turacyawukomeyeho. Bikerekana urukundo n' ubumwe dufitanye nk'abana b'Imana, Yo yadukunze kugeza aho itwoherereje Umwana wayo w'Ikinege ngo aducungure « *Nkoramutima zanjye, ubwo Imana yadukunze bigeze aho, natwe tugomba gukundana. Nta muntu wigeze abona Imana, ariko niba dukundana, Imana idutuyemo kandi urukundo rwayo ruba ruganje muri twe (Yh 4.11-12).*

Ubwo bumwe bukwiye kuranga uwa Kristu wese, ni kimwe mu byatumye ku itariki ya 16/11/08, abakristu ba Paroisse ya Muhororo bari muri Chorale Magnificat yaho, hamwe n'abandi babyifuje, bafata urugendo berekeza muri paruwasi ya Gisenyi. Igitekerezo cy'urwo rugendo bagitewe nuko uwahoze ari Padiri Mukuru wabo Emmanuel Nyampatsi, yahawe ubutumwa muri Paroisse ya Gisenyi. Bifuje rero kuza gusura urugo, bagamije kandi gukomeza umubano no kugirana ubucuti hagati ya Paroisse ya Gisenyi na Paroisse ya Muhororo . Abo bakristu bari mu nama y'abakozi, igizwe n'abacuruzi, abarimu, abaganga n'abikorera ku giti cyabo. Bahagurutse saa kumi n'ebiyili (6h) za mu gitondo, saa yine baba bashyitse ku Gisenyi ; bakirwa na bagenzi babo nabo bari muri Chorale Magnificat ya Paroisse ya Gisenyi.

Gahunda y'urwo rugendo yari yateguwe mu buryo bukurikira:

*\*Gusangira igitambo cy'Ukaristiya, \*Kwidagadura ( umukino wa volley-ball), \*Gusabana.*

Igitambo cya Missa cyatangiyeye i saa tanu, kiyoborwa na Padiri Emmanuel Nyampatsi Padiri Mukuru wa Paroisse ; maze gihimbazwa na Chorale Magnificat ya Muhororo yari yifuje gusangiza abakristu ku ngabire yayo. Mbere yo gutangira Missa, Padiri yabanje kwerekana abashyitsi, ababwira n'impamvu y'urwo ruzinduko. Mu nyigisho y'uwo munsu, yibanze ku Ivanjili y'umugani w'Amatalenta atanu yabikijwe abagaragu ; bitwumvisha ko urukundo Imana itugaragariza buri munsu, rukwiye kudutera umwete wo kudatinya kubyaza umusaruro ingabire zitandukanye iha buri wese , kugirango igihe nikigera, natwe Nyagasani azatubwire ati : *'Nuko mugaragu mwiza kandi udahemuka, wabayeye inyangamugayo mu bintu bike, nzagushinga ibisumbyeho, ngwino wishimane na Shobuja '(Mt25.14-30).*

Missa ihumuje, hakurikiyeho kwidagadura. Nk'uko byari byateganijwe, bakomereje ku kibuga cya paroisse, ahabereye umukino w'intoki (volley-ball), watangiye isaa saba n'igice uhuza ikipe ya Chorale Magnificat ya Paroisse Stella Maris ya Gisenyi, n'iya Chorale Magnificat ya Paroisse ya Muhororo. Wari witabiriwe n'abantu benshi mu ngeri zose.

Umukino watangiye ubona amakipe yombi anganya ubushobozi mu kibuga . Ntibyari byoroshye rero, kuko ayo makipe yombi yari agizwe n'abakinnyi banyuranye kandi bose b'abahanga ; barimo Padiri Léonidas Ngomanziza wakinaga mu ikipe ya Chorale Magnificat ya Gisenyi. Nyuma ariko, ibintu byaje guhinduka aho ikipe ya Magnificat ya Gisenyi yaje gutsinda ikipe ya Magnificat ya Muhororo ; Iseti ya mbere ku bitego 26 kuri 24 .

Nyuma y'akaruhuko gato, igice cya kabiri cyatangiyeye, maze Magnificat ya Muhororo nayo yerekana ko itari inganzwa aho yishyuye bidatinze Iseti ya mbere, iyitsinda ku bitego 26 kuri 24 bya Magnificat ya Gisenyi. Kunganya kw'amakipe yombi byatumye bumvikana, maze bemeza gukina indi Seti ya gatatu, kugira ngo haboneke ikipe yegukana umuhigo. Barakomeje, noneho hagati y' amakipe yombi rurambikana rubura gica, abafana bari bategereje aho intsinzi iri buve naho iri butahe reka sinakubwira bariyereka ! Ntibyatanzwe , Magnificat ya Gisenyi iba yegukanye Iseti ya kabiri ku bitego 25 kuri 21.

Chorale Magnificat ya Gisenyi iba icyuye umuhigo, maze ipfunyikira ityo Chorale Magnificat ya Muhororo, kado nziza y'ama Seti abiri kuri imwe.

Umupira urangira saa munani n'igice, abari aho bose bishimiye uko uwo mukino wagenze.

Nyuma y'umupira w'intoki, ubusabane bwakomereje mu nzu y'ikana, ahabereye ibiganiro binyuranye byahimbajwe n'indirimo buri chorale yagiye iserukana, bituma barushaho gushyikirana, dore ko na buri wese wari uraho yari yicaranye n'uwo badasanganywe. Hari hatumiwe abayobozi mu nzego zinyuranye za paruwasi, abahagarariye korali za paruwasi, n'abahagarariye Imiryango y'Agisiyo Gatolika n'Amakoraniro y'abasenga.

Prezida wa Komite Nyobozi ya paruwasi ya Gisenyi mu ijamba rye, yabanje gushimira abakristu ba Muhororo, igitekerezo cyiza bagize cyo kuza kubasura. Ababwira imiterere ya paruwasi: igizwe n'ama santrali atanu ariyo Gisenyi – Rambo- Bugoyi – Rubavu na Muhato. Avuga ko aho ku Gisenyi nta nama y'abakozi irahatangira, ariko hakaba hari ama Komisiyo akorera muri paruwasi, abiri muri yo akaba ari umwihariko aho ku Gisenyi. Ayo ni:

*\*Komisiyo ya Twiyubakire Paruwasi na \* Komisiyo ya Jumelage (ububanyi).*

- Komisiyo ya « Twiyubakire Paruwasi » ni Akanama kifujwe kandi gashyirwaho n'abakristu hagamijwe gushakisha inkunga muri bo, yo kunganira paruwasi mu bikorwa binyuranye by'amajyambere ya paruwasi, tudategereje inkunga zivuye hanze, kuko« ak'imuhana kaza imvura ihise ».

- Komisiyo ya jumelage (ububanyi) yashyizweho ngo ijye iserukira paruwasi hirya no hino, haba muri paruwasi za Diyosezi yacu, ndetse n'izo mu yandi ma Diyosezi, hagamijwe gushakisha ubucuti aho hose; abakristu bakamenyana, bagasurana, kandi bakungurana ibitekerezo ku byatuma paruwasi irushaho kwiteza imbere. Ngo 'Ijisho rya mukuru ntirizinduka riba ryagiye kureba'. Birumvikana ko muri uko gusurana, buri wese agenda areba imikorere y'ahandi, ibyo ashimye akabishimangira iwabo, n'ibyo anenze akabirinda iwabo.

Yongera kubashimira ababwira ko nabo bazabishyura bidatinze.

Nyuma y'ijamba rya Prezida wa Komite Nyobozi ya Paruwasi ya Gisenyi, President wa Chorale Magnificat ya Muhororo nawe yabagejeje indamutso ye muri aya magambo: «Tunejwe no kuba hamwe namwe, kandi tubazaniye amahoro. Tuje kubasura no kureba ko uwo twabahekeye amaze kumenyera urugo. Twishimiye ko dusanze yaramenyereye. Tumwije natwe ko tuzakomeza gutwaza tudacika intege, kuko amatalenta yadusigiye twayabyaje atanu». Ababwira uburyo Chorale Magnificat yavutse ibyawe n'inama y'abakozi, ubwo hizihizwaga umunsi w'Abakozi ku itariki ya 01/05/ 06, maze asoza abagezaho intashyo y'abakristu ba Muhororo kandi abashimira cyane uburyo babakiriye, abasaba kandi ko bagirana ubucuti, akaba ari n'icyifuzo muri rusange cy'Abakristu ba Muhororo nk'uko Prezida w'Inama y'Abakozi yaho nawe yongeye kubisubiramo.

Ubwo busabane bwasoje n'ijamba rya Padiri Mukuru wa Paroisse, wababwiye muri make ko yishimye kandi ashima. Agira ati: “Ndishimye kandi ndashima igitekerezo cyiza mwagize cyo kuza gusura urugo. Muhujwe nanjye, bivuga ngo umubano watangiye kandi uzakomeza. Hari byinshi Muhororo izigira kuri Gisenyi, hari byinshi na Gisenyi izigira kuri Muhororo”. Ababwira ukuntu Chorale Magnificat ya Muhororo yayibonye ivuka, itangira buhoro buhoro, none ikaba imaze gutera imbere ifashijwe n'abatarahwemye kuyitangira.

Asoza yongera kubashima, maze abasezeraho aha umugisha abari aho bose, kandi abifuriza urugendo rwiza.

Urwo ruzinduko barusoje mu ma saa kumi n'igice, basubiraye bishimiye uko uwo munsi wagenze.

*Ubukristu bukomeze kutubyarira ubuvandimwe nyabwo, nkuko twabyiyemeje.*

BAMURANGE M.Françoise  
Chorale Magnificat / P.GISENYI

## « DUSHAKIRE HAMWE INZIRA Z'AMIZERO »

Kuva ku wa 27 kugera ku wa 30 Ukuboza, i Nairobi mu gihugu cya Kenya habereye ihuriro mpuzamadini ry'urubyiruko rugera ku 6000 rwo mu bihugu by'Afurika y'Iburasirazuba bwo hagati ndetse n'abandi benshi bari baturutse muri Sudani, muri Afurika y'Epfo, mu Bulayi no mu Bushinwa. Byumvikane ko abenshi bari Abanyakenya baturutse mu mpande nyinshi z'icyo gihugu. Urwo rubyiruko rwari rwahujwe n'Umuryango w'Abavandimwe b'i Taizé mu gihugu cy'Ubufaransa. Ihuriro ryo muri Kenya rikaba ryari rije rikurikira andi mahuriro abo bavandimwe bari baherutse gukoresha bafashijwe na Kiliziya z'ibihugu yabereyemo nk'ayabereye i Johannesburg (Afrique du Sud), i Calcutta (Inde). Amahuriro ya vuba ni ayabereye i Cochabamba (Bolvie en Amérique Australe) mu Ukwakira 2007 ni i Genève (en Suisse) mu Ukuboza 2007.

### UMURYANGO W'ABAVANDIMWE BI TAIZE

Ni Umuryango mpuzamatorero w'i Taizé mu gihugu cy'Ubufaransa. Washinzwe na Frère Roger mu 1940. Ubu uwo muryango w'abavandimwe b'i Taizé umaze kugira abafurere b'abagatorika n'abaprotestanti, bagera mu ijana baturutse mu bihugu 25 binyuranye byo ku isi. Imibereho yabo ihamya by'ukuri ko ubumwe bw'abakristu bushoboka kugerwaho. Ikindi kandi iyo mibereho igamije, ni uguhamya ko umubano mwiza mu mahoro nawo wagerwaho muri Kristu.

Hashize imyaka myinshi uwo muryango witangira Iyogezabutumwa mu rubyiruko: muri ubwo butumwa bafite harimo kubakira bihoraho aho ngaho i Taizé cyangwa gutegura amahuriro mpuzamahanga aba rimwe cyangwa kabiri mu mwaka. Urubyiruko rugira amahirwe yo kujya muri ayo mahuriro yateguwe n'abo bafurere, narwo ruba ruhamagarirwa kuba abahamya b'ubumwe muri bagenzi babo no mu matorero baba baturutsemo.

### IHURIRO MPUZAMAHANGA RY'I NAIROBI MURI KENYA

Iryo huriro ryo ku wa 26-30 ukwakira muri Kenya ryiswe URUGENDO NYOBOKAMANA RWO GUHAMYA AMIZERO KU ISI. Ingingo remezo nayo yari iyi: DUSHAKIRE HAMWE INZIRA Z'AMIZERO. Ibikorwa by'ihuriro byabaye amasengesho; ibiganiro binyuranye birimo n'ubuhamya.

#### *1. Amasengesho*

- Mu gitondo urubyiruko rwasenganaga n'abakristu bo muri paruwasi zabaga zabakiriye  
- Sa sita nyuma yo gufungura, habaga isengesho rusange riyobowe n'abavandimwe b'i Taizé. Iryo sengesho ryaberaga mu iseminari nto ya Nairobi (Saint Mary Queen of Apostles) iri ahitwa Ruaraka. Aho mu iseminari niho hari hateguriwe n'ubundi gukorerwamo gahunda zose z'ihuriro. Saa saba urubyiruko rwose rwateraniraga mu ihema rusange ry'ibiganiro abavandimwe b'i Taizé bakayobora amasengesho y'ibisingizo (harimo nko kuririmba zaburi ngufi z'ibisingizo nka zaburi 67; 63; 103; 121; kuririmba indirimbo za alleluia; harimo kandi gusoma no kuzirikana ijamba ry'Imana cyane cyane nk'amasomo ya Mt4,18-22; Mk6,37-44; Ezk37,1-2.9-14; Mt11,25-30; Ef3,14-19; Ibyak4,32-35; Yer29.5-14; Lk10,30-37. Nyuma yo gusoma no kuzirikana bucece ijamba ry'Imana, umwe mu bafurere w'i Taizé yatangaga inyigisho. Uwakunze kuyitanga cyane ni Furere Alois. Isengesho ryo ku manywa n'irya nimugoroba saa kumi n'ebyiri ryakorwaga kimwe.

## 2. Ibiganiro

Gahunda y'ibiganiro n'ubuhamya : iyo gahunda yabaga saa munani. Urubyiruko rwihitiragamo ikiganiro. Hari ingingo nyinshi zo kuganiraho zari zateguwe kandi hateguwe n'ahantu hanyuranye ho kuganirira. Ingingo zakunze kugarukwaho cyane ni izi :

- Kumenya umugambi Imana imfiteho : ndi iki imbere y'Imana, Imana imfasha ite kwimenya, namenya nte umuhamagaru wanjye ; namenya nte inzira Nyagasani ashaka kunyuzamo mu buzima bwanjye.

- Bibiliya isomwa ite ? umuntu yabeshwaho ate n'ibyo ayukuramo ?

- Ukwemera ni iki ? Ibyerekezo ni ibihe ku wemera : yugarijwe ni iki, afite amahirwe he ? Nagenza nte abatemera ku kwemera nyako (ubuhamya) ?

- Twamagane intambara n'amakimbirane : ubuhamya bw'ababigezeho mu bihugu bimwe.

- Gukira ibikomere, kwakira amahoro y'umutima : kwiyunga muri wowe no kwiyunga n'abavandimwe.

- Guhura na Kristu mu muvandimwe : kwitangira abandi bifite kamaro ki mu buzima bwacu. Twitangire abandi dute baba aba kure cyangwa aba hafi ?

- Imiryango-remezo ya Kiliziya, amatsinda y'ubuzima : ubuhamya bwa Kiliziya zo mu bihugu bimwe.

- Twakora iki, twafatanye iki n'abayisilamu (ubuhamya) ?

Uretse ziriya ngingo zinyuranye zaganirwagaho, hari hateganyijwe ahantu urubyiruko rwashoboraga gusengera bucece no kuzirikana ijambo ry'Imana. Hari hateganyijwe kandi gukurikira imyidagaduro mu ndirimbo no mu mbyino hakurikijwe umuco wa buri gihugu : Kiliziya y'u Rwanda yaserukiwe n'itorero ry'urubyiruko rwa Arikidiyosezi ya Kigali mu ndirimbo za Rugamba Sipiriyani.

UMWANZURO

## RUBYIRUKO NI IZIHE NZIRA Z'AMIZERO DUFITE UBU ?

Kugira ngo Ivanjiri ibe koko intwari yo guharanira ubwiyunge ni ngombwa ko habaho amahuriro, ibiganiro, ubuhamya n'isengesho. Abavandimwe b'i Taizé barabaturarikirira cyane (buri kwezi batugezaho kuri site yabo ya internet « [www.taize.fr](http://www.taize.fr) »-rubrique « prière et chant » gahunda zabo zihoraho zo gusengera ubwiyunge mu bitaramo by'amasengesho, bizera ko iyo gahunda ababishobora bayigerageza muri paruwasi zabo. Hari kandi na lettre de Taizé (ibaruwa y'i Taizé) bagerageza gushyira mu ndimi nka icumi isohoka rimwe mu mezi atatu kugira ngo ishobore kumurikira abayisoma inzira y'ubwiyunge bayobowe na Bibiliya. Kuyibona yo ni ukwandikira Abavandimwe bi Taizé kuri iyi aderesi : [letter@taize.fr](mailto:letter@taize.fr) Urubyiruko rwahuriye muri Kenya rwungutse byinshi : ubucuti, ubufatanye no kungurana ibitekerezo n'urubyiruko ruturutse mu bindi bihugu.

« Tureke gute kuvoma ku isoko y'umicanga n'ibirohwa ? Nta kundi ni ukudahuga ku ijambo ry'Imana. Ngaho aho twavoma amizero n'ibyishimo. Ukinguriye Imana umutima we, aba aharuriye Imana inzira no mu yindi mitima ya benshi ». (Furere Alois, Taizé Nairobi, le 27/12/2008).

Padiri BIZIMANA Yohani Damaseni  
Paruwasi Murunda

## **BARAHUYE BIFURIZANYA UMWAKA MUHIRE.**

Ku nshuro ya mbere, abakozi bakora muri Service za Diyosezi zikorera ku Nyundo bahuriye hamwe i Kigufi, bifurizanya Noheli nziza n'Umwaka muhire wa 2009. Izo ni : Caritas mu nzego zayo zose, - Abashinzwe Inyigisho z'Iyobokamana, (Catéchèse) – Abashinzwe Amashuri Gatolika , – Abita ku Butabera n'Amahoro, – Abashinzwe Guhuriza Hamwe Imirimo y'Iyogezabutumwa, n'Abakozi ba Centre Pastorale.

Guhurira hamwe basaza umwaka, byari bisanzwe bikorwa n'Abakozi ba Caritas n'Umuyobozi wabo. Muri uyu mwaka icyo gitekerezo bifujye kugisangiza izindi services zikorera muri Diyosezi, maze bese babyakirana ubwuzu ; nibwo ku ya 23/12 bahuriye kuri Paroisse ya Gisenyi, bakomeza berekeza i Kigufi. Abakorera mu tundi turere nka Ngororero nabo ntibahatanzwe, bafashe urugendo baza kwifatanya na bagenzi babo.

Uwo munsu wabanjirijwe n'igitambo cya Missa, yatangiye isaa tanu , iyoborwa na Musenyeri J.M.Vianney NSENGUMUREMYI uhagarariye Amashuri Gatolika muri Diyosezi ya Nyundo. Hari na Padiri Etienne MUKERAGABIRO uhagarariye Caritas ya Diyosezi, na Padiri Fabiyani RWAKAREKE ushinze Guhuza Imirimo y'Iyogezabutumwa muri Diyosezi .

Icyo gitambo cya Missa cyari icyo gushimira Imana yabarinze muri uyu mwaka wose, maze igakomeza kuyobora ibikorwa byabo, bakaba bahuriye hamwe ngo bongere bazirikane ku butumwa bashinzwe, barusheho kubunoza, kandi bafate ingamba nshya yo kubukomeza neza, bafashijwe na Roho w'Imana.

Nyuma y'igitambo cya Missa, bahuriye hamwe baraganira. Bamaze kwibwirana, bunguranye ibitekerezo, ndetse batanga n'ibyifuzo ku byatuma barushaho kunoza neza umurimo basangiye wo kwitangira imbaga ya Kristu muri Kiliziya.

### **IBYIFUZO**

- ▶ Hifujwe ko bajya bahura nibura 2 mu mwaka:
  - \* ku munsu w'abakozi uba mu kwezi kwa gatanu ( bizihiza umunsu w'abakozi) , no
  - \* mu mpera z'umwaka mbere ya Noheli (bifurizanya Noheli nziza n'umwaka muhire).
- ▶ Gukora umwihereho nko mu gihe cy'i gisibo : Kuri iyi ngingo, hifujwe ko hagiye haboneka abajya batanga inyigisho zatuma nabo bashobora gufasha abo bashinzwe, byarushaho kubafasha.
- ▶ Kuganira ku mikorere ya buri service, bityo n'utayikoramo akaba yashobora gusobanurira uwo ariwe wese wagira icyo ayimubazaho.
- ▶ Gukora ingendo shuri (habonetse ubushobozi bagatemberera no mu zindi Ntara, nko kureba ibyiza nyaburanga n'ibindi binogeye ijisho, bityo ntiduhezwe ku by'iwacu ngo abanyamahanga badutange kubimenya) .
- \* Ku byerekeye umunsu w'abakozi, hifujwe ko hakubahirizwa gahunda za Leta uko biteganywa, buri service ntigende ukwayo nk'uko byari bisanzwe, bagahurira hamwe bese bakora urugendo ruteganyijwe (defilé) kandi bafite ibyapa bibaranga ; nyuma y'aho bakareba aho bahurira bakaganira bakomeza kwizihiza uwo munsu.

Ibi byifuzo ntibyahise bifatirwa imyanzuro ako kanya , niyo mpamvu hashyizweho Komisiyo iziga neza uko ibi byose byazatangira gushyirwa mu bikorwa. Iyo Komisiyo igizwe

n'Abahagarariye Services zose za Diyosezi, ikazayoborwa na Padiri Fabiyani RWAKAREKE usanzwe ayobora Service ihuza Imirimo y'Iyogezabutumwa, ari nawe uzajya ageza ku bakozi bose imyanzuro yafatiwemo.

Nyuma yo gutanga ibitekerezo ndetse n'ibyifuzo, ibiganiro byakomereje ahari hateganyirijwe ifunguro rya saa sita, nyuma y'aho bakomeza gusabana ndetse bagira n'umwanya wo gusura urwo rugo rwiza rwa Kigufi rwitegeye ikiyaga cya Kivu , dore ko hari byinshi bibereye ijisho, kubireba byonyine bikaruhura wa wundi wananiwe.

Uko guhurira hamwe bakamenyana maze bagasabana, byashimishije buri wese wari uhari , ku buryo ntawashidikanya ko icyo gikorwa gitangiye kizakomeza , ndetse kigahuza n'abandi batashoboye kuhaboneka icyo gihe, nk'abakozi ba Economat Général babimenye baramaze gufata izindi gahunda, ndetse n'abandi..

Bongera gushimira cyane Ubuyobozi bwa Caritas ya Diyosezi bwatekereje icyo gikorwa, maze mu ma saa kumi, basezeranaho bose banezerewe, bongera kwifurizanya Umwaka muhire!

BAMURANGE M.Françoise  
Coordination Pastorale /Nyundo



## **UMUPFAKAZI W'INTANGARUGERO YARATABARUTSE**

Consolatie NYIRAHAGENIMANA yavukiye muri Paruwasi ya Murunda mu 1969. Yashakanye na Sipiriyani SIBORUREMA mu 1993, uyu yitaba Imana nta mwana amusigiye. Consolatie yiyumvisemo igitekerezo cyo kwegurira Imana ubupfakazi bwe nubwo uwo muhamagaro ntaho yari awuzi. Yafashe umugambi wo gufasha abandi, mu bukene bwe, yumva kandi yemera ko hari abandi bamurusha gukena.

Ubufasha bwe yabutekereje cyane cyane kuri roho. Ayobowe na Marie Nathalie icyimpaye, umufasha w'Iyogezabutumwa, yamenye umuryango witwa Fraternité Mwamikazi w'Izuka (Fraternité Notre Dame de la Résurrection) asobanuriwe na Padiri Lerusse hamwe n'abapfakazi bo muri Paruwasi ya Kanyanza yo muri Diyosezi ya Kabgayi. Hari mu 1997 ubwo yinjijye muri uwo muryango.

Ukwemera yari afite kwamufashije kumva ko urukundo rurusha imbaraga urupfu, ndetse ko urupfu rutadutandukanya n'abo twashakanye, bityo rukaba rudafite ijamba rya nyuma. Ntiyashidikanyije ko ubuzima buhoraho ku Mana, akomera atyo ku isezerano ryo gushyingirwa (ubumanzi) yagiranye n'umugabo we Sipiriyani.

Ntiyihareranye ibyiza yasanze mu muryango Fraternité Mwamikazi w'Izuka (FNDR), yawushishikariye abandi bapfakazi ku buryo muri Diyosezi ya Nyundo ubu bageze kuri 13, naho abitabye Imana akaba ari bane.

Uretse intego yihariye kuri uwo muryango ubutwari bwe yabugaragaje byimazeyo kuko ari mu bapfakazi ba mbere batangije amahuriro y'abapfakazi b'abakristu gatolika cyane cyane iryo muri Paruwasi ya Murunda yabereye Visi Perezida igihe kirekire. Ubu amahuriro ashinze imizi mu maparuwasi yose ya Diyosezi ya Nyundo akaba ahujye abapfakazi bagera ku 4.862.

Mu buzima bwe busanzwe yarangwaga no gufasha abatishoboye, imfubyi zitagira kivurira, kwiyumanganya, kugaragaza ishyaka afitiye Kiliziya akunda Misa. Yitabye Imana ari umukozi wo mu bukarani bwa Paruwasi ya Murunda.

Yatabarutse kuwa gatandatu tariki ya 9/8/2008 mu bitaro by'i Kabgayi, nyuma y'igihe gito yari amaranye uburwayi. Umunsi wo kumushyingura, ku cyumweru tariki ya 10/8/2008 waranzwe n'ibyishimo kubera icyo ntwari twizeraga ko igiye kongera ubuvugizi bw'abapfakazi mu rusange rw'abatagatifu.

**IMANA IMUHE IRUHUKO RIDASHIRA.**

**DUSABEMARIYA Patricie**

Uhagarariye amahuriro y'abapfakazi b'abakristu  
Gatolika muri Diyosezi ya Nyundo

## UMUVUGO : NDASABA SINTEGEKA

Wangabiye Mwami,  
Wangabiye rwose simbe inganizi  
Ngo mbe ingagari iyi igana ibyago  
Ngo ibyiza byose mbibure imyaro !

Wangabiye Yezu ukangira inganji,  
Ijambo ryawe rikaba ingango  
Ntwaza hose ngarura iminyago  
Ngasiga Sekibi mu kimwaro  
Wowe usendereye imitsindo  
Wangabiye rwose wowe Mugenga  
Ndasaba sintegeka.

Wangabiye urukundo rutimira  
Ukangira ingabo rutimirwa,  
Irukubira aho rwagimbye,  
Ikarusendereza isi yose.

Icyanjye cyose cyaba urukundo:  
Imvugo yanjye yaba urukundo  
Ingendo yanjye yaba urukundo  
Indoro yanjye yaba urukundo  
Ibiganza byanjye bikagaba urukundo  
Umwuka wanjye ukaba urukundo!

Narutera nkarwuhirira  
Narubagarira rukera  
Narwubakira rugatura  
Narutunga rukemarara !

Ubugome nabuhinda  
Ubwange nkabukubanga  
Ubwiko nkabwimira  
Ubwaku nkabwangiza  
Ubwicanyi bugacika  
Ubwiza bugaca ibyimbo.

Nahuga ya zahaha  
Amatati nkayatokoza  
Amatiku ngacecekesha  
Amahoro nkayatonesha !

Nahashya ya sahinda  
Igihunya kikhamba  
Amahano agahomoma  
Muntu agatora agatotsi.

Agahinda nagahuta  
Ibyago nkabyangiza  
Ibyiza nkabyagaza  
Nkabisakaza amahanga.

Wangabiye Yezu,  
Wangabiye injishi y'indacika  
Nkajisha ururimi rwanjye  
Runshira ibico birindwi  
Ngacumura ubudacurera  
Ngacisha ukubiri nawe.

Narushumura rujya gusenya  
Cya rusenzi cyatuzonze  
Narureka rukisihinga  
Rugahashya ruremankwashi  
Maze nkamushikamira  
Agashira agashirira.

Naruserutsa rujya gusenga  
Gusingiza no gushima  
Gushengerera Mugenga  
Kurata Nyirubutore.

Naruzitura,  
Rujya gucyura  
Rujya gucyeza ;  
Rujya gucyebura  
Rujya kugorora ;  
Rujya guhuza  
Rujya guhaza.

Rujya guhanga  
Aho guhoroza,

Rujya guhoshu  
Aho guhohota,  
Gutesha aho gutonesha,  
Gutuza aho gutakisha,  
Gutanga aho kwakira  
Kubika aho kumena ibanga  
Guhashya umwanzi shitani  
No kuramya Umwami wanjye.

Ururimi uru !  
Naruha inshingano itajegajega  
Yo guceceka rukamenya ubwenge  
Rwashishoza inshuro zirindwi  
Nkarushumurira aho rudashungwa  
Ngo rushukashukwe rwirate,  
Wangabiye rwose wowe Mugenga  
Ndasaba sintegeka.

Wangabiye Mwami,  
Wangabiye agasuka aka k'umujoyojo  
Kakaba intwari yo kwitsinda  
Ngaca umusoto w'inshurabwenge  
Nyuzamo iyi nda ihora imbeshya  
Ngaca iruhande rw'umuco wawe.

Nayiyobora igaca aho ushaka  
Yajya kurenga akabuga kayo  
Nkayicyamura nkayicyaha  
Nabona inyigaritse burundu  
Nkagutabaza wowe Mugenga  
Ukayicyesha uko ubyifuzaga.

Wangabiye inshyimbo rutimirwa  
Maze ikayobora umubiri wanjye  
Mu rwuri rubereye Rwema;

Ubwirasi nabuhwika  
Ubwomanzu nabutwika  
Nakwiga intambwe yawe  
Uko ndi kose nkakwirekurira  
Nitwaje inshyimbo umpaye.

Nakubera icyo wifuzaga  
Nka ya ntama yumva umushumba  
Uhora ucyereye kuyicyesha.

Wangabiye Yezu,  
Wangabiye ingabire ndengakamere

Yo kugabura amahoro utanga;  
Nayasiga hose ahacuyutse:  
Ahaga hose nayahahanga  
Amahano agahanwa  
Amatage agatabwa  
Amatiku agatuza  
Umutuzo ugatura  
Ubwenge bukema  
Ubwema bukera.  
Nahaminja amahoro yawe  
Nahatuza ibitunganye  
Nahahaza ibyiza utunga  
Nahaminja ibishashi byawe  
Nahahata ubutoni bwawe.

Wangabiye Mwami,  
Wangabiye rwose nkaba umuvuzi  
Cyangwa nkema nkaba umukinzi  
Uyu w'umuhanga utari inganizi;  
Nakiza bese mu bwitonzi  
Mu rugero ushaka no kubo ushaka  
Indwara zose nkazimira  
Izasheshe nkaziha inshinge  
Izihishiye nkaziha inkingo  
Maze nawe ukabiha ishimo.

Ngabira Yezu umpe ibinkwiye  
Maze mbikwize ibyoko byose  
Ibyansi byeze ibyiza byawe,  
Nshyire ku ruhimi uru runihira,  
Iyi si ntuye isomeho ishime  
Ibyiza byawe biyizihire  
Maze biyiseseke ku nkiko  
Inkaka zawe zuhe inkeke  
Inkingi z'ijuru zikanye  
Ziririmbe ishimwe ryawe  
Maze igukunde uyigire imbata,  
Wangabiye rwose wowe Mugenga  
Ndasaba,sintegeka!

UZAMBERUMWANA Anthère  
Chargé de discipline  
Ecole Secondaire St.Jean Murunda

## UMUVUGO W'UMWE MU BASHOJE AMAHUGURWA Y'IMYAKA 10 MU BUTABERA N'AMAHORO

1. Impangukana bigwi turasoje  
Dusoje tugiye gutangira  
Ubuzima buzima  
Buzira kuzima.
2. Nshize agahinda  
Nshize impumu  
Ubujijuke narabutoye  
Ubujiji narabutaye.
3. Umuryango-remezo n'inama  
Sinshaka abajya mu kibazo cyanjye  
Uburere narabutojwe  
Ubutabera burakaramba iwacu.
4. Sinarinzi urukundo  
Ubutabera n'amahoro  
Mbisogongeye numva biraryoshye  
Mbyuje ngira umunezero.
5. Kera numvaga bavuga ubutabera  
Amahoro bayatera umugongo  
Ubutabera n'amahoro  
Ari imbuto imwe isoromwa  
Na buri wese.
6. Ubutabera bwa kera  
Bwashingiraga ku nda za bamwe  
Bakambeshya ngo buraharanirwa  
Kandi amaherezo bukandamiza.
7. Diyosezi isobanukirwa na bwo  
Yugurura amarembo  
Paruwasi inama Umuryango-remezo  
Twinjira bwangu tutazuyaje  
Kuko icyari gihangayikishije  
Cyarebaga buri wese.
8. Twese intero yari imwe  
Nzarata amahoro niyo dushaka  
Nzarata amahoro niyo nifuza  
Nzarata amahoro niyo duharanira.
9. Ubutabera buha buri wese kurengerwa  
N'amategeko mu bwisanzure  
Niho abantu bose bavoma buzira  
Kuvogerwa.
10. Yezu adutoza ayo mahoro

Yifuza yuko tuyahorana

Ashaka yuko tuyabamo  
Tukaba inkunzi z'amahoro.

11. Yezu yigishije abamwumva  
Kwirinda ihohoterwa aho riva rikagera  
Gukunda ababi ndetse n'abeza  
Gukunda bose tutarobanuye.

12. Buri wese akwiye kwikomezamo  
Umuco w'Ubutabera n'Amahoro  
Ugashimishwa no kubana na bagenzi bawe  
Mukagera ku busabanirama bwuzuye.

13. Nkuko tubisoma muri Bibiriya  
Zaburi ya 84 umurongo wa 13 kugera 14  
Ubutabera buzangenda imbere  
Intambwe ze zigaragaze inzira  
Uhoraho ubwe azaduha ihirwe  
Maze isi yacu izarumbuke imbuto.

14. Ukuri muri twe bakangurambaga  
Ukuri muri twe Bakristu  
Ukuri muri twe Bayobozi  
Ukuri muri twe Bihayimana.

15. Naritaye mu gutwi ndabegera  
Numva imigambi myiza bafite  
Guharanira Ubutabera n'Amahoro n'ingenzi  
Naho umuvumo w'ikinyoma uragatsindwa.

16. Kugendera ku kuri n'Ubutabera  
Biha buri muntu agaciro akwiye  
Tugomba guca bugufi tukareba igikwiye  
Tukubaka ejo hazaza heza ha buri wese.

17. Urubwiruko ntirwahejwe  
Kuko ari rwo Rwanda rwejo  
Rwinjiye amarembo y'amahoro  
Rukoresha imbaraga zarwo  
Mu kubaka ubumwe mu rungano  
Ubwiyunge n'Ubuvandimwe  
Mu Banyarwanda.

18. Ni ngombwa ko abemera bose  
Babaho bunze ubumwe n'abantu bose  
Bihatira kumva abantu bose  
Mu rurimi rwabo kavukire.

19. Ubutabera n'Amahoro buritangirwa  
Amategeko arubahirizwa

Sinarinzi kurengera abandi  
Kuko narindi Nyamwigendaho.  
Kutagira gihana n'ishyano ribi  
Iri ryabuze gihanura  
Harakaramba ubutabera n'amahoro  
Kuko bwankuye ahaga.

21. Sinarinzi igitambo cy'ukuri  
Tukajya mu missa tugatura igitambo  
Nagera mu rugo ngatura biheko  
Urubyaro rwanjye.  
Uti mubyeyi mpera abana amahoro  
Ubushishozi burahataha.  
Mbikesha abakangurambaga  
Nshyira hasi nyura inzira imwe.

22. Sinarinzi ibyishimo  
Imbabazi n'amahoro ko ari ingenzi  
Mbona nta gipimo nabipimisha  
Mbirenga ku munzani w'ubukristu  
Ndicara ndatuza mererwa neza.

23. Impuhwe ubudahemuka  
Byinjira mu bantu benshi  
Amahoro aganza mu mitima ya benshi  
Aha intebe zirabazwa  
Buri wese yicara ku ntebe ye y'amahoro.

24. Ahu!!! Reka nduhuke

20. Akaga nabonye narakumvise  
Muntu reka nguhe agaciro kawe  
Kuko ugizwe n'ibintu bitatu  
Umubiri umutima n'ubwenge  
Roho yawe ndeke kuyitera agahinda  
Kuko nayishegeshe  
Ntaramenya ukuri nyako kwa buri wese.

25. Turanze tubaye ubukombe  
98 dutangira bitugoye  
Gukubitwa no gufungwa  
Sinigeze ncika intege mu bandi.

26. 2008 turasoje tugiye dusanze abadutumye  
Uko nabaye intwari mu bigoye  
Nzakomeza ubwo butwari.

27. Ntwari mwitangiye ubutabera n'amahoro  
Turabashima.  
Murakagwira nk'ubwoya bw'inka  
Murakaramba nk'ubwatsi bwazo.

28. Indatenguha mu bakuru  
NTAMUHANGA Tereza  
Paruwasi Kivumu.

## **BUZIMA JYA EJURU TERA IMBERE**

*N D L R*

*Buzima jya Ejuru ni Umuryango w'Agisiyo Gatolika w'abasheshe akanguhe ukorera ku isi hose . Mu Rwanda watangiriye muri Diyosezi ya Nyundo, none utangiye no kugera mu zindi Diyosezi . Twavuga nko mu Gatsata muri Arikidiyosezi ya Kigali ; Kibangu na Nyarusange muri Diyosezi ya Kabgayi. Ubwo umuyobozi w'uwo muryango mu rwego rw'Igihugu Nathalie icyimpaye yasuraga abanyamuryango bo muri Paruwasi ya Kibangu, umwe mu banyamuryango yamugejejeho umuvugo ugaragaza uko abasheshe akanguhe bagira uruhare mu gukwirakwiza umusemburo w'amahoro muri Kiliziya ya Yezu Kristu. Reka tubareke mubyisomere.*

Nguyu umunsi utagira uko usa  
Uteye abasheshe akanguhe gususuruka  
Twabaye umwe nta kimwaro  
Kuko dushorewe n'Iyaduhanze

Yezu Rukundo, Yezu Mukundwa  
Uri Umwami ukaba umubyeyi  
Utanga amahoro n'ibyishimo  
Mu bibazo byinshi tuguhanze amaso  
Kuko n'ubundi uri igisubizo  
Abasheshe akanguye turakwiyeguriye.

Yezu udukunda Yezu dukunda  
Twarebye byinshi twumva byinshi  
Dusanga byose nta kavuro  
Nyamara kwibanira nawe iminsi yose  
Ni cyo cy'ingezi simbabeshya.

Nubwo imibiri ifite intege nke  
Roho zacu turazigutuye  
Nizijye ejuru mu byiza byawe  
Roho waduhaye adutere imbaraga  
Tugire urukundo ndetse twizere  
Ukwemera nk'agakoni twicumba  
Yezu Rukundo turakwizeye.

Abasheshe akanguhe twihe agaciro  
Twirinde imivumo mu bana bacu  
Tubifurize imigisha n'inema nyinshi  
Tubatoze gukunda buri wese  
Basenge kenshi nta buryarya  
Roho w'Imana abarinde ibirangaza.

Roho mwiza uri indahangarwa

Twaraguhawe ngo utube hafi  
Ntako utagira ngo tumenye Imana  
Komeza uturinde icyaha uturinde icyago.

Roho wa Data turagushima  
Twebwe twese turakwituye  
Utube hafi dukomere cyane  
Ingabire zacu zubake abandi  
Mu bwiyoroshye n'ubugwaneza  
Tugire urukundo tugirane inama.

Yezu wazutse nitumwimike iwacu  
Tumuhe icumbi yiyicarire iwacu  
Ibiturushya abicoce  
Adutoze gukunda  
Kuko yitwa Rukundo.

Niduhe amahoro abavandimwe bacu  
Tube abanyamahoro dukunde amahoro  
Twamamaze ibyiza bya Nyagasani

Nidusabe kuzitahira neza  
Tutanduranyije tudasize umugayo  
Iby'isi ntibikadutware umutima  
Ngo twibagirwe ibyiza biri  
imbere duteganyirijwe.

Ibyo Yezu Kristu adukorera buri muni  
Nabishimirwe abyubahirwe mu bandi  
Haba mu ijuru no kwisi yose  
Yezu wacu ni igitangaza.  
Bikira Mariya naduhakirwe

Murakoze kuntega amatwi.

Mariya NYIRABASHOZA  
Buzima jya Ejuru  
Paruwasi KIBANGU

**IJAMBO RYA PEREZIDA WA KOMITE NYOBOZI YA PARUWASI KIBUYE,  
KUWA 12.10.2008, MU MISSA Y'UMUNSI MUKURU Y'UMUGANURA WA  
PADIRI KUBWIMANA INNOCENT.**

- Banyakubahwa Basaserdoti ? Ntumwa za Yezu ,
- Banyakubahwa mwihaye Imana mu miryango inyuranye y'Abihayimana ,
- Banyakubahwa Bayobozi mu butegetsi bwa Leta mu nzego zinyuranye,
- Bashyitsi bavandimwe muri hano,
- Bakristu mwese muteraniye hano, Kristu Yezu akuzwe.

Bakristu babyeyi, bavandimwe, mbere y'uko mvuga ijambo mwantumye, nagira ngo mbasabe mumfashe tubanze turamutse, tunasuhuze Abasaserdoti bose mubona hano imbere yanyu.

Bakristu muteraniye hano mwese, ndagira ngo na none mbanze mbashimire mwese uko mungana uku, kuba mwaje kwakira ku mugaragaro Padiri Mukuru Jean Paul RUTAKISHA na Padiri Elie HATANGIMBABAZI.

Ndagira ngo kandi mbashimire ko mwaje kwakira Padiri KUBWIMANA Innocent, umwana wanyu kuri bamwe, umuvandimwe wacu, Umusaserdoti w'imfura Paruwasi Kibuye yibarutse tariki ya 20.09.2008 i Kiziguro muri Diyosezi ya Byumba.

Ndagira ngo mbamenyeshe kandi ko uyu muni dusezera ku mugaragaro kuri Padiri Mukuru Gaudens MURASANDONYI, twabanye muri iyi paruwasi imyaka itanu yose. Ntabwo ari hano muri uyu muhango kubera impamvu yagize ariko yadutumyeho ko turi kumwe ku mutima kandi ko ashobora kuza kuba ari kumwe natwe mu kindi gice cyateguriwe uyu muni.

Bakristu bavandimwe, uyu muni ku itariki ya 12.10.2008, Paruwasi Kibuye ikomeje ibyishimo yatangiye tariki ya 22.6.2008 ubwo twari kumwe na Nyiricyubahiro Musenyeri Alexis HABUYAMBERE, Umwepiskopi wa Diyosezi ya Nyundo wahisemo gusoreza icyumweru cy'uburezi Zone Pastorale Kibuye, muri Paruwasi yacu ya Kibuye.

Umwepiskopi mu nyigisho ikomeye yagejeje ku bari bitabiriye uwo muni muri rusange, by'umwihariko urubyiruko, yavuze ko uburezi butagira ukwemera, uburere budafite ibyo bintu buba ari imfabusa.

Umushumba wa Diyosezi yacu yatubwiye ibintu byinshi bitwubaka ariko ibyo twakwibukiranya ni ibyo ngibyo bigize umuntu nyamuntu. Nibi birori turimo ubu, turabikesha abahawe uburezi bubonekamo ziriya nkingi 4 zibugize.

Paruwasi Kibuye na none ikomeje ibyishimo yarimo ku itariki ya 29.6.2008 ubwo yizihizaga ku nshuro ya mbere mu myaka 47 imaze ishinzwe, umunsi mukuru wa Mutagatifu Petero Intumwa, Umurinzi wa paruwasi Kibuye.

Padiri Mukuru Gaudens MURASANDONYI, mu nyigisho ye y'uwo muni, yavuze birambuye ku murimo wa gitumwa muri Kiliziya ya Yezu.

Bavandimwe, kwibukiranya iminsi mikuru paruwasi yagiye ikora cyane cyane muri uyu mwaka ntabwo ari ukurondogora, ahubwo ni ukwibukiranya ko umunsi mukuru wose muri paruwasi, amagambo y'Abashumba b'Intama za Yezu avugirwamo aba ari ubutumwa burimo inyigisho zitwubaka buri muni mu buzima.

Uyu muni rero tariki ya 12.10.2008, paruwasi Kibuye ikomeje ibyo byishimo yakira abasaserdoti: Padiri Mukuru Jean Paul RUTAKISHA na Padiri Elie HATANGIMBABAZI uzajya afasha paruwasi Kibuye mu mirimo y'Iyobokamana abifatanyije n'ubuyobozi bwa CARITAS muri Zone Pastorale Kibuye.

Uyu muni kandi, turakira Padiri KUBWIMANA Innocent.

Bakristu bavandimwe, wenda muri mwe hari abibaza bati : ko Padiri Mukuru Jean Paul na Padiri Elie tumaranye nabo iminsi hano kuri paruwasi, tukababona mu ma santarali, tukababona mu nkambi ya Kiziba, kubakira ubu aho ntibyaba ari impita gihe ? Oya ntabwo ari impitagihe.

Muri iyi minsi mike ishize turi kumwe nabo, twabanje kubafasha gushyira ibintu bazanye mu myanya yabo. Ivarisi ishyirwa aho yagombaga kujya, igikapu gishyirwa aho cyagombaga kujya n'ibindi n'ibindi gutyo.

Rero ibintu tumaze kubishyira ku murongo mu buryo, twasanze byasozwa n'uyu muni wo kubifuriza twese hamwe ikaze muri paruwasi Kibuye, tubabwira ko amarembo yuguruye, imiryango ikinguye, tubabwira ko baje bisanga mu babo, ngo bakomeze bagubwe neza nk'uko bigaragara.

Nyakubahwa Padiri Mukuru Jean Paul, paruwasi Kibuye mwoherejwemo na Nyiricyubahiro Musenyeri ngo muyiyobore, yaragijwe Petero Intumwa. Yashinzwe muri 1961, ikaba ari imwe mu ma paruwasi 21 agize Diyosezi ya Nyundo, ikaba kandi imwe mu ma paruwasi 10 agize Zone Pastorale Kibuye.

Iri mu Burengerazuba bw'Akarere ka Karongi. Mu majyaruguru ya paruwasi Kibuye hari Paruwasi Mushubati, yashinzwe muri 1935. Mu majyepfo hari paruwasi Gisovu yashinzwe muri (1993), mu majyepfo ashyira Iburengerazuba hari paruwasi Mubuga yashinzwe muri 1933, Iburasirazuba hari paruwasi Birambo yashinzwe muri 1947, Iburengerazuba Paruwasi Kibuye ikikijwe n'ikiyaga cya Kivu.

Paruwasi Kibuye igizwe n'amasantarali atatu(3) n'inama z'imirenge 19 n'imiryango-remezo 52.

-Santarali Kibuye paruwasi ifitemo icyicaro igizwe n'inama 9 n'imiryango-remezo 22,

-Santarari Ruragwe igizwe n'inama 6 n'imiryango-remezo 21,

-Santarari Gitesi igizwe n'inama 4 n'imiryango-remezo 9.

Paruwasi Kibuye ifite aba kateshiste 18 b'abakorera-bushake bitangira kandi barangiza neza umurimo bakora.

Komite 3 za paruwasi zirahari, ariko komite ncungamutungo ntiyuzuye. Izo komite no mu masantarali zirahari.

Muri paruwasi hari n'izindi komite na komisiyo:

-Hari komisiyo y'ubutabera n'amahoro,

-Hari komite ya Caritas,

-Hari komite y'urubiruko,,

-Hari komite y'abakozi,

-Hari komite ya Liturujiya,

-Hari komite mpuzamiryango ya Agisiyo Gatolika.

Paruwasi Kibuye ifite imiryango ya Agisiyo Gatolika n'amakoraniro y'abasenga igera ku munani, ariko izwi ko ikora ni : -Legio Maria,-Charismatique,-Abanyamutima Mutagatifu wa Yezu, -Abasaveri,-Aba néo-cathecumenat,-Aba AGI.

Paruwasi Kibuye ifite ibigo 10 by'amashuri abanza:

-Muri Santarari Kibuye hari ibigo 4: Gasura, Gitarama, Karongi na Kibuye.

-Muri Santarari Ruragwe hari ibigo 4: Muvungu, Nyabikenke, Nyagisozi na Ruragwe.

- Muri Santarari Gitesi hari ibigo 2: Gitesi na Muvungu.

Amashuri yisumbuye paruwasi Kibuye ifite ni Collège S<sup>te</sup> Marie gusa, ariko muri E.T.O Kibuye no muri K.H.I Nyamishaba, paruwasi ihafite communautés z'abanyeshuri gatolika.



Ubukungu bwa paruwasi Kibuye ni abakristu bayo, ubu babarirwa hagati ya 4.000 na 5.000, mu gihe mbere ya jenocide bari hafi 15.000.

Mbere ya jenocide, abakristu mu missa ya mbere buzuraga Kiliziya, mu missa ya kabiri bikaba uko ndetse hakaba n'abicara hanze ku ibaraza, abo mu ma santarari bataje.

Ubu ngubu mu missa zombi, usanga mu Kiliziya hari imyanya irimo ubusa. Kiliziya yuzura iyo habaye missa imwe cyangwa iyo abakristu bo mu masantarari baje.

Uko kuba abakristu ba paruwasi Kibuye ari bake, hari impamvu 3 zabiteye cyangwa se zibitera :

- 1) Hari jenocide yahitanye abakristu benshi muri iyi paruwasi,
- 2) Hari abakristu bahunze bapfiriye mu buhungiro, hakaba hari n'abataratahuka.
- 3) Hari amadini menshi akikije iyi paruwasi, bamwe mu bakristu bacu bagiyemo kubera gushiduka bitewe n'amarere babona muri ayo madini cyangwa se kubera izindi mpamvu zabo bwite zinyuranye.

Muri uyu mugwi wa Kibuye, mu Kagari ka Kiniha honyine hari amadini n'amatorero 14, paruwasi Gatolika itarimo. Ayo matorero n'amadini ni : E.P.R, Adventiste, ADEPR, EAR, UEBR, Assemblée de Dieu, Néo-Apostolique, Restauration church, Gauchen, EEAR, Témoins de Jehovan, Eglise Vivante, Eglise Méthodiste Libre, Islam n'andi tutazi amazina yayo.

Nubwo ariko hari ubwo bwinshi bw'amadini n'amatorero maturanyi ya paruwasi Kibuye, abahisemo kuyoboka Kiliziya Galolika nta kibaca intege. Buri mwaka paruwasi Kibuye irabatiza, abagarukiramana bariyongera barimo n'ababa bagarutse bava muri ayo madini cyangwa se amatorero.

Nyakubahwa Padiri Mukuru Jean Paul,

Nyakubahwa Padiri Elie,

Ndagira ngo abakristu bari hano bongere babampere amashyi n'impundu kuko muje muri paruwasi Kibuye mwisanga.

Muje mwisanga kuko musanze Padiri Gilbert Ntirandekura. Ni mutarambirwa, akaba Mudaheranwa n'ibitotsi kabone n'iyo igicuku cyaba kinishye kangaha. Ni Rudakangwa n'imvura n'ubunyereri, nta zuba rimubasha, nta mavunane ajya agira iyo atabaye umurwayi. Ni Mutiganda gutabara umukristu batabarije no guhumuriza umukristu wese uri mu ngorane. Ni intwari mu butumwa bwa Yezu.

Twizeye tudashidikanya ko mwebwe nka bakuru be muzafatanyaga gukomeza urugamba rw'ingoma y'Imana, Petero Mutagatifu akazabafasha kutugeza ku ntambwe Yezu atwifuzaho.

Muje na none mwisanga kuko muje musanga abakristu, imbaga y'Imana mushinzwe iri hano imbere yanyu ikaba inamaze kubakira.

Bakristu ba paruwasi ya Kibuye,

Uyu muni na none turakira Padiri Innocent Kubwimana. Umusaserdoti w'imfura ya paruwasi Kibuye.

Mbere y'uko nkomeza ijamba, ndagira ngo mbasabe mwese uko muri mu byiciro by'imyaka inyuranye, mushimire Imana Nyagasani, muyivugirize impundu, muyikomere amashyi kuko ikuye paruwasi Kibuye mu bugumba yari imaranye imyaka 47. Iduhayeho Padiri Innocent Kubwimana, nimushimire Yezu Nyagasani.

Burya iyo umuntu yishimye ntabona n'icyo avuga, uretse nyine gutwarwa n'ibyishimo.

Mu kinyarwanda baravugaga ngo Imana iraguha ntimugura. Iyo tuba abagura nayo tuba twarabikoze tukagura umusaserdoti, tukamwita kavukire kuko uruvange rw'amagambo kuri paruwasi Kibuye yo kutagira umusaserdoti uyivukamo, yabaye agatereranzamba bigera n'aho ahinduka ururondogoro.

Mu kinyarwanda na none baravugaga ngo Itangishaka kandi ngo Irumva. Nta mwaka ushira Umwepiskopi adasuye paruwasi zose zo muri Diyosezi ye. Hano muri paruwasi Kibuye, ikibazo cyo kutagira umusaserdoti nibura umwe w'imbuzakurahira kavukire wa paruwasi ntitwaburaga kukimubwira.

Mu mwaka w'2006 turi aha ngaha, ikibazo twakivuzeho, Umwepisikopi Nyiricyubahiro Musenyeri Alexis Habiyambere, yadusubije atubwira ko usaba Imana atarambirwa. Ati : Abasaserdoti batangwa na Yezu. Ati : mukomeze musabe, ati ariko mu gusaba kwanyu muzirinde kwijujuta. Ati : Imana irumva kandi isubiriza igihe ishakiye.

Nyiricyubahiro Musenyeri, iryo yavuze rirashye, abavugaga ngo paruwasi Kibuye irazinze, nibamenye ko nta ruzingo yari ifite, ni uko igihe Imana yari yaragennye cyari kitaragera. Niba kandi rwari runahari, ku bubasha bw'Imana Padiri Kubwimana Innocent araruciye. Ejo cyangwa ejo bundi azaba yakurikiwe.

Bavandimwe rero, Imana niyo igena kandi niyo izi imigambi ifitiye ibyo yaremeye byose.

Nyakubahwa Padiri Innocent Kubwimana, mfura paruwasi Kibuye yibarutse mu myaka 47 imaze ishinze, uje uri mfura izakurikirwa. Paruwasi umubyeyi ikwibarutse mu zabukuru ntizabyara umwe nk'ingwe, ntabwo izahagarara kubyara. Ejo izaba yabyaye ubuheta, ejo bundi ibyare ba Nyandwi, ba Nyaminani, ba Nyabyenda, ba Macumi naba Misago izababyara.

Ntawe uhata Imana, itanga uko ishaka kandi itanga igihe ishakiye, Padiri Innocent irakuduhaye, igukuye mu Basaserdoti b'Umuryango w'Umutima Mutagatifu wa Yezu na Bikira Mariya. Ninde wari ubizi ko mfura mu Basaserdoti ya paruwasi Kibuye izaturuka muri uwo muryango ? Imana nibishimirwe n'ahandi izahakura abandi.

Dukomeze rero dushimire Imana, yo iba izi byose, ikamenya n'uburyo ibishyira kuri gahunda.

Dukomeze kandi dusabire Padiri Kubwimana Innocent kuzarangwa no guharanira gufasha abaciye bugufi no gukwiza inkuru nziza ya Yezu mu gihugu n'ahandi hose Imana izamwohereza mu butumwa.

Dushimire kandi ababyeyi be b'umubiri n'aba roho, tubashimire uburezi bamuhaye butumye agera kuri uru rwego rw'Ubusaserdoti.

Abamwigishije bese kuva muri primaire kugeza abaye Padiri kimwe n'abamufashije bakanamushyigikira muri urwo rugendo, cyane cyane Abasaserdoti b'Umuryango w'Umutima Mutagatifu wa Yezu na Bikira Mariya, nibishimire ko imbuto babibye yaguye mu gitaka cyiza none itanze umusaruro ushimishije.

Abakristu namwe mwakomeje gusenga, biragaragara ko mu masengesho yanyu mwasabanye ukwemera no kwizera none Imana itangiye gutanga ibisubizo. Nimukomeze rero muyishimire ineza itugiriye.

Bakristu bavandimwe,

Nk'uko natangiye mbivuga, uyu muni paruwasi yacu iri mu byishimo byo kwakira Padiri Mukuru Jean Paul na Padiri Elie, kwakira Padiri Innocent Kubwimana no gusezera kuri Padiri Mukuru Gaudens ndetse na Padiri Gérard.

Nk'uko mubizi, Padiri Mukuru Gaudens wabaye hano imyaka itanu(5), yahamagawe kujyana ubutumwa bwa Yezu muri paruwasi Mushubati, naho Padiri Gérard wabaye hano imyaka cumi(10) ashinzwe cyane cyane ibikorwa bya CARITAS na Home S<sup>t</sup> Jean yoherejwe na Yezu mu butumwa muri paruwasi Kinunu.

Bakristu bavandimwe, kubona umuntu mwabanaga neza mu mirimo ikomeye nk'iyo Abasaserdoti bashinzwe yo kuyobora Kiliziya no kuyobora imbaga y'Imana mu cyimbo cya Yezu, kubona umuntu nk'uwo agiye bitera akantu abo asize, ariko nta kundi byagenda. Abasaserdoti ni Intumwa zigomba kugeza ijamba ry'Imana ku bantu bese n'ahantu hose. Yezu ati : Nimugende mwigishe amahanga yose dore kandi ndi kumwe namwe iminsi yose ; Mc26,18-20. Cardinal Karori Lavigerie nawe yunze mu rya Yezu agira ati : mube intumwa ntumugire ikindi muba cyo kinyuranyije n'iyo ntego.

Umusaserdoti ni Intumwa ya Yezu, ibindi waba umushakaho sibyo. Nawe ibyo yakora atatumwe na Yezu sibyo.

Uyu muni rero, paruwasi Kibuye irasezera mu byishimo kuri Padiri Mukuru Gaudens wimuriwe i Mushubati ndetse na Padiri Gérard wimuriwe i Kinunu.

Izo ntumwa n'Intore za Yezu zimaze koherezwa i Mushubati n'i Kinunu, hari abakristu byatunguye kuko bumvaga ko wenda bitashoboka biyibagiza ko atari abanyakibuye bonyine bakeneye kugezwaho ijambo ry'Imana.

Kuba rero Padiri Gaudens na Padiri Gérard Yezu yarabohereje mu butumwa ahandi, tugomba kubyakira dutyo kandi tukabyishimira, kuko aho byajyaga kutubera ikibazo, ni uko Yezu atari kuba yaratwoherereje abandi bashumba.

Igihe rero twabanye n'abo bapadiri si gito. Turabashimira uburyo bwiza twabanye, turabashimira inama nziza baduhaye, turashimira buri wese mu butumwa yarimo, uburyo yitangiye kuburangiza.

Bakristu ba paruwasi Kibuye,

Muzi by'umwihariko ukuntu mwabanye na Padiri Gaudens, muzi ukuntu mwitsiritanaga buri muni, haba hano kuri paruwasi mu bibazo binyuranye, haba se mu miryango-remezo yayisuye. Uburyo mwabanye murabuzi, kubasura, kubaha inama, gusangira nawe ijambo ry'Imana, gufatanya nawe mu bindi bikorwa biranga Intumwa za Yezu n'ibindi. Uwavuga ngo niyateye ikirenge mu cya Yezu, uwo nguwo yaba afite amaso ariko ntabone.

Uburyo yakoreye iyi paruwasi burashimishije, icyo mbona twamwitura ni ukumwifuriza gukomezanya umurava kwamamaza Inkuru nziza ya Yezu aho yoherejwe n'ubwo imyumvire y'abaho yaba itandukanye n'iy'abino aha.

Bavandimwe,

Nubwo Padiri Gaudens tutari kumwe hano ubu ngubu muri iyi mihango irimo ibera ahangaha, yohereje ubutumwa avuga ko turi kumwe, yongera kutwibutsa ko uyu muni tugomba kuwufata mu minsi mikuru ikomeye y'amateka y'iyi paruwasi ibonye umupadiri wayo w'imfura mu myaka 47 imaze ishinze. Uwo rero uvugwa ni Padiri Kubwimana Innocent.

Bakristu ba paruwasi Kibuye,

Mu kinyarwanda, umubyeyi iyo aje kukwereka umwana, uwo mwana agira icyo ahabwa. Kiliziya ya Yezu nk'umubyeyi, umwana yabyaye yaje kumwereka paruwasi Kibuye undi mubyeyi, ni ku bw'iyi mpamvu paruwasi Kibuye umubyeyi weretswe umwana, yageneye uwo mwana impano cyangwa se izimano. Nyakubakwa Padiri Innocent, paruwasi Kibuye iguhaye inka izajya igukamirwa kugira ngo uzakure neza kandi uzakurikirwe.

Padiri Gaudens nawe, kubera ko yaragiye neza intama yari ashinzwe hano muri paruwasi Kibuye, akaba agiye i Mushubati nta n'imwe asize yarazimiye mu gihe yari amaze hano, paruwasi Kibuye imuhaye intama y'urwibutso rw'ubushumba bwiza yagaragaje.

Bakristu mwese muri hano, nimukomeze mwishime kandi munezerwe, munezeranwe n'Abasaserdoti bese Yezu Kristu yabatoyemo.

Umuni mwiza kuri mwese.

BANYAGA Ignace  
Paruwasi Kibuye

**UMUVUGO :  
UWAGUHANZE**

**SHIMIRA**

Kibuye shimira Imana iragukunda  
Kibuye shimira uwaguhanze  
Kibuye reba hirya no hino  
Urebe urukundo n'impuhwe Nyagasani  
Akugirira maze uvuge uti shimwa Mana.

Ntukibaye umugi w'ikivume  
Kuko Nyagasani yumvise amaganya  
N'amarira yawe none akaba agukijije  
Amenyo y'abasetsi, izina ry'ubugumba  
Ukaba urisezeyeho;

Reka mbanze nshimire iyahanze  
Aba babyeyi bo bemeye kwakirana  
Urukundo icyo Nyagasani abageneye  
Amezi icyenda bategereje bizeye  
Yarangira bakabona agahozo

Nyagasani yabageneye ntibakiharerane  
Ngo bakagire akabo, bakagatura uwagahanze  
Mu ngoro ye na ko kakiga gutaguza gasanga  
Litari ya Nyagasani kakemera kumwiyegurira  
Ntigasebye izina ry'uwagahanze.

Ngaka agahozo ka paruwasi ya Kibuye  
Ngiki igisubizo cy'ibibazo byahangayikishije  
Benshi aho buri wese yibazaga niba Kibuye  
Itabyara abahungu cyangwa niba ababyeyi  
Baho ari ingumba.

Mbega Nyagasani ngo araduhaza nkuko  
Yahojeje Ana! Amasengesho yacu avanze  
N'Amarira Nyagasani yarayumvishije none  
Uko yahaye Ana Samuel ho igihozo niko  
Iduhaye Kubwimana Innocent ho igisubizo.

Dore umunsi utagira ukusa  
Dore umunsi utazibagirana muri paruwasi  
Ya Kibuye tariki 20/09/2008 ni umunsi  
Usibanganije izina ubugumba ni itariki  
Y'ibyishimo Nyagasani aduhaye amarira;

Padiri Kubwimana Innocent reka nkurate  
Urabikwiye nkuvuge ibigwi, nkuvuge imyato  
Nguhunde ibisigo n'ibisingizo ubaye imfura  
Mu bahungu, ubaye icyerekezo cy'Imana  
Wanze gusebya izina ry'Uwaguhanze.

Erega burya izina niryo muntu  
Umunsi Nyagasani akuremera mu nda  
Y'umubyeyi wawe ntibeshye mwavutse  
Muri impanga utangira guhimbwa agatama  
Ukiri mutoya abana barikwise bari beretswe;

Burya niho ubutorwe bwawe bwatangiye  
Kwigaragaza nubwo uwo mwavukanye  
yatabarutse akiri muto Nyagasani Yamugeneye  
ibimukwiye none nawe Komeza inzira  
watangiye  
Wibere ntama w'Imana.

Padiri Kubwimana Innocent  
Ubaye intwari ku rugamba, ubaye  
Rudacogora ku mihigo, ubaye urugero  
Rwiza mu basore, ubaye igihozo cya  
Paruwasi Kibuye ishema n'ubutwari.

Ubyawe ni Umutima Mutagatifu wa Yezu  
Toza abakuri inyuma kwiye gurira  
Nyagasani  
Komeza ikirenge aho icya bakuru bawe  
Mwicaranye kivuye kuko bakinyujije aho  
Nyagasani ashaka kandi babereye abandi  
urugero.

Mfura yacu uracyari mutoya rangamira  
Uwaguhanze maze umusabe ingabire  
Y'ubuhanga n'ubushishozi ahore agushyira  
Imbere abakubanjirije mu kumwiyegurira  
Maze nawe usabire abasigaye.

Reka mbashimire kiziguro we  
Ngiki icyuzuzo kiduhuje naraje ngaruka  
Nseka akimara kuvuka Cyuzuzo ari mu byahi  
Impundu zibona umwanya. Ngicyo icyari cyiza  
umunsi wo guturaga cyashimishije benshi.

Abamubereye abatoza mu kwiye gurira  
Nyagasani, imbuto mwabibye zireze  
Zibyaye umusaruro mwinshi kandi usonzoye  
Benshi kuko udukuye mu nzara mbi Nyagasani  
Abongerere imigisha kare ijana.

Reka nshimire Abasaserdoti Nyagasani  
Yahamagaye n'abakiri kumwe natwe kuva  
Paruwasi yacu yashingwa mu w'1961 bemeye  
Kutugezaho Inkuru Nziza ya Yezu Kristu  
Bakemera kugera ikirenge mu cya Paulo.

Bihanganiye byinshi byabananizaga  
Imisozi miremire bakayiterera ntibaruhuke  
Kugeza Yezu ku batagishoboye kuva mu rugo  
Abo ni nk'abasaza, abakecuru n'abarwayi  
B'abakristu bahabwa amasakaramentu

uko bikwiye. Baharwanye urukomeye nyuma  
Y'amahano yabaye mu gihugu cyacu mu  
w'1994  
Umwanzi yashatse ko ukwemera gusibangana  
Aho yigabije paruwasi yacu ngo ayihindure  
Amatongo ariko Petero Umurinzi wayo

Yarahatubereye mu w'1995 amadini  
Avuka ku bwinshi, abadafite ukwemera  
Bibwira ko inzira ya Paruwasi ifunzwe  
Ariko agati gateretswe n'Imana  
ntigahungabanywa  
n'Umuyaga uko bibwiraga.

Siko biri kuko dutaramiye Nyagasani  
Umwepiskopi yatwoherereje abasore  
Bintarumikwa biyemeje kwegurira ingufu  
Zabo Nyagasani maze si ugutarura intama  
Zazimiye bakoze amanywa n'ijoro ntibaruhuka.

Ntibigeze bijana mu gukorera uwabahanze  
Ntibaciwe intege yuko nta n'uwo twibyariye  
Ubafasha bakoze ubutumwa bahawe ariko  
Ntibahwemye mu kudusabira amavi yabo  
Yahoraga hasi none igisubizo kirabonetse.

Mubo mbonsha amaso baturi hafi namwe  
Muzi aho badukuye wareba nk'inararibonye  
Mu kwemera Muzehe Padiri Gasigwa Modeste  
Ibigwi bye murabizi naho yakuye paruwasi yacu  
Mwibuke n'amatongo yari irimo.

Intarumikwa n'ubutwari Padiri

*Uragahora uri Umusaseridoti wa Nyagasani iteka.*

Murasandonyi Gaudence  
Ingendo ze mu misozi miremire ntawe  
Nazibwira murazizi, abo yagaruye kuri  
Alitari ni benshi ni mumumpere amashyi.

Uwo Nyagasani yarasiyeho imirasire  
y'urukundo  
N'impuhwe Ntirandekura Gilbert aho atugejeje  
Murahazi ku isengesho nakomeze asusurutse  
Ingoro ya Nyagasani ntizagire igihunga  
akiyihumekeramo  
Nakomeze ayisusurutse;

Haje abageni twiyarikiye batwikururanwa  
Ishema n'ubutwari uwo ni P. Rutakisha J.Paul  
Padiri Hatangimbabazi Elie ni mwicare  
mugubwe  
Neza Murasandonyi yasize aharuye n'abakristu  
Kandi tuzaberekerwa.

Mfura yacu Padiri Innocent, hari benshi babaye  
Intwari batwara Kibuye bayigeza ku kwemera  
Kandi batayivukamo, none igihe kirageze ngo  
Wowe uyivukamo ushyireho akawe, nubwo  
uyizi

Kubarusha ntuzatinye kubagisha inama kuko  
Nta muhanga mu by'Imana kandi bakubonye  
Izuba muri byose. Ngaba ababyeyi nguwo  
Umuryango mushya Nyagasani akwinjijemo  
Ntuzatire igihango wagiranye n'Umutima  
Mutagatifu wa

Yezu n'Umubyeyi Bikira Mariya bo wisunze.  
Ababyeyi tugufatiye iry'iburyo n'amasengesho  
ya  
Kiliziya akuri inyuma, umuryango-remezo  
W'Abakurikiye Yezu ukomokamo uragusabira  
Guhora inyuma ya Yezu.

Mukarusengo Jeannette  
Paruwasi Kibuye

## **UMUVUGO : IMPARIRWA KURUSHA**

Shuri shingiro ry'ubwenge

Shuri nshakiramo ubuhanga  
Tugane ishuri tujye guhaha

4.Ubumenyi isoko y'ubuzima.

Ndavuga ishuri se w'abahanga  
Mbanze ndate abarezi bacu  
Batwitangira buri muni  
8.Ntibatinye amanywa y'ihangu.

Ntacyo nabona nk'igihembo  
Uretse kwiga nshyizeho umwete  
Ngakunda ibyiza ibibi nkabyanga  
12.Ntimugosorere mu rucaca.

Nanjye bimpa akanyamuneza  
Bikantera ishema mu bandi  
No kwitwararika ibyo niga  
16.Ngo nirinde kubatamaza.

Twana duto tungana nange  
Mwumve mbacire akagani keza  
Baca umugani mu kinyarwanda  
20.Ngo izibika zose zari amagi.

Menya ko mwarimu ukwigisha  
Yaje kwiga ari muto nkawe  
Atazi kandi gufata itushi  
24.Maze arabyiga arabyigana.

Na muganga usana abarwayi  
Izo ndembe ziza zitaka munda  
Agasobanura amara yazo  
28.Nubumenyi bwo mu ishuri.

Ubwo buhanga butuma ahembwa  
Akabaho neza akanezerwa  
Yaba yicaye hamwe atuje  
32.Ati: ubumenyi n'isoko y'ubuzima.

Rabagirana Ruragwe nziza  
Abana bawe turakurata  
Horana ihirwe mu bihe byose  
36.Ijabo ryawe ntirite ijambo.

Ndubuvivi bwo mu ishuri  
Abambanjirije ni benshi  
Nciye akenge njinyuma yanyu  
40.Ngo ntazakandagizwa uruzungu.

Murezi wuzuyemo urukundo  
Mubyeyi urerera Igihugu cyawe  
Ugahora urangwa n'imico myiza  
44.Amaboko arembuza abagusanga.

Ikivi untangiza nzacyusa  
Ntabwo nzaba igihararumbo  
Ubone ko utaruhiye akamama  
48.Maze Imana iguhore hafi.

Icyampa kugira inema y'ubuhanzi  
Cyangwa inganzo nk'iyabasizi  
Nkagusingiza uko bikwiye  
52.Wowe nkesha ubumenyi isoko  
y'ubuzima.

Banyeshuri tuvindimwe  
Rubyiruko rwuru Rwanda  
Nimuze twese tugire ishyaka  
56.Ubumenyi n'isoko y'ubuzima.

Hirya y'ejo huru Rwanda  
Nahasiganuje abansumbye  
Nsanga hazaba abahanga  
60.Bize iby'ikoranabuhanga.

Reka nsoze nzasubira  
Nkomeze mpimbe mpanga ibyiza  
Imbaga nyamwinshi igatega yombi  
64.Twese tukiyubakira ejo heza.

Twizerimana Rosine  
Ikigo cy'amashuri abanza ya Ruragwe  
Paruwasi Kibuye

## **UDUKURU TWO HIRYA NO HINO**

Ku Gisenyi hafi ya Paroisse Stella Maris, hari ikigo ndangamuco cya Diyosezi ya Nyundo, kizwi ku izina rya "Vision Jeunesse Nouvelle". Icyo kigo kiyoborwa na Frère Gabriël Lauson wo mu muryango w'Abafuriri b'Inyigisho za Gikristu (Frères de l'Instruction Chrétienne) .

Mu bikorwa bikorerwa muri icyo kigo, harimo guteza imbere sport mu rubyiruko rwiga n'urutiga batibagiwe n'abasheshe akanguhe, kuruvana mu bujiji : kwigisha gusoma , kwandika no kubara (Alphabetisation), kwiga indimi, kumenya gukoresha Ikoranabuhanga no kwigisha abana batavuga (ibiragi) bitewe n'impamvu zinyuranye, kumenya umuco nyarwanda (Culture), kwigisha Iyobokamana (Evangelisation) ndetse n'imyuga iciriritse (guhanga).

**Ukwezi kwa 01 kugera mu kwa 02/09:** Bamwe muri urwo rubyiruko rukorana na Vision Jeunesse Nouvelle rwibumbiye muri “club Imboni”, rwerekanye Film hirya no hino, mu rwego rwo kurwanya ihohoterwa rikorerwa abana.

Abiga gusoma, kwandika no kubara , bo bakoze ubusabane hagati yabo n'abayobozi babo, bishimira intambwe nziza bamaze gutera. Abagera kuri 80 nyuma y'amahugurwa babonye, boherejwe hirya no hino mu myuga itandukanye kugirango babashe kwiteza imbere.

**Tariki ya 01/01/09:** Ku munsu wa mbere w'umwaka, abakristu bari basagutse Katedrali ya Nyundo. Mu gitambo cya Misa Musenyeri Alexis Habiyambere yongeye kubibutsa gushimira Imana ibyiza byinshi Imana yatugiriye, anabashishikariza gutangirana umwaka umutima wibuka ko byose tubikesha Imana kandi ko idusaba guhora twunze ubumwe tugaharanira no kuba ingirakamaro kugira ngo dutenze imbere imiryango yacu n'Igihugu cyose.

**Tariki ya 07/01/09:** Myr Alexis Habiyambere yari i Kigali ku cyicaro cy'Inama y'Abepiskopi Gatolika bo mu Rwanda, aho yayoboze inama y'abagize itsinda rihoraho ry'iyi nama (comité permanent).

**Tariki ya 14 na 15/01/09:** Abapadiri bose ba Diyosezi ya Nyundo bahuriye mu nama yabo isanzwe, ikaba nyine yari iya mbere y'umwaka, bifurizanya umwaka muhire. Muri icyo nama abashinzwe imirimo rusange muri Diyosezi batangarije Abapadiri ibyakozwe mu mwaka ushize, banabamenyesha gahunda bimirije imbere muri uyu mwaka wa 2009. Mu gusoma inama, abapadiri batashye ku mugaragaro Home St.Barthélémy yo ku Nyundo, yasanwe ikanavugururwa.

Abifuzaga kuhakorera inama amarembo arakinguye.

**Tariki ya 18/01/2009:** Kominote ya Emmanuel ku Gisenyi imaze kubona ko ingo nyinshi zitakigira akanya ko kuganira, haba hagati y'ababyeyi ubwabo, hagati y'ababyeyi n'abana , no hagati y'abana ubwabo; ibyo kandi bikaba byaba intandaro y'ibibazo ingo zikunze guhura nabyo; yateguriye igitaramo ingo z'abashakanye ndetse n'abibana, kigamije kunoza umubano no kunga ubumwe mu rugo, bafashijwe n'isengesho. Babonye akanya bamwe bari barabuze ko guhura, baraganira, basangira ifunguro, baridagadurira, ndetse barabyina (biyibutsa n'izo twita iza kizungu) . Nibyo bise “Akagoroba k'Abashakanye”( Soirée des Couples).

Saa kumi n'imwe na cumi n'itanu (17h15') niho bose bahuriye mu nzu ndangamuko (Centre Culturel) yo ku Gisenyi, abashakanye bakiri kumwe agatoki ku kandi, abibana nabo barisungana, ubona ko bose bishimiye imbuto bari busarure muri ubwo busabane.

Bamaze kwibwirana no gusingiza Imana, babanje kugezwaho inyigisho yari yateguriwe ako kagoroba igira iti : “URUKUNDO MU RUGO IWACU”.

Iyo nyigisho yabibukije byinshi kuko yatumye basubira ku isoko y'Isakramentu ryo gushyingirwa, bareba niba bataratatiye igihango bagiranye kuri uwo munsu. Basanze henshi mu ngo nta rukundo rukiharangwa, barebera hamwe inzitizi, maze bafata ingamba biyemeza kuvugurura umubano wabo. Batanze ubuhamya ku byabafashije ndetse batanga n'ibyifuzo :

Ubuhamya : Bamwe bati :

- Ntitwari tuzi ko dushobora kwishima nkuku twishimye.
- Sinashoboraga gutinyuka kuvugira mu ruhamwe, none kubera ibyishimo mbigezeho.
- Twajyaga duhishana imitungo n'ibindi, none birangiye.
- Ntitwaherukaga gusangirira ku meza amwe none birangiye aha.
- Najyaga nibeta umugore nkajya kubyina mu ma boîtes, ngataha mfite ubwoba, none ubu ntaribumbaze aho narindi kuko turi kumwe, kandi nsanze ko no mu rugo iwanjye nshobora kuhakeshereza igitaramo gishimishije, ntiriwe njya kure.
- Twajyaga tubura akanya ko kwicarana mu rugo rwacu ngo tuganire buri wese ategere undi amatwi,

abana nabo tubagenere umwanya wo kubumva, none kuva uyu muni, uwo mwanya ntuzongera kubura.

- Bamwe ndetse ntitwaherukaga kuvugira hamwe isengesho mu rugo, none tugiye kurishakira akanya.

Ubuhamya bwabaye bwinshi ntawaburungiza, gusa icyagaragaye nuko bose bafashijwe kandi ntawatashye uko yaje, abari bafite ingo zijegajega bose bafashe umugambi wo kuzivugurura.

Ibyifuzo :

- Bifuje kujya babona inyigisho kenshi zatuma barushaho kunoza imibanire mu ngo, kuko akenshi kutabikangurirwa, aribyo bikunze gutera ibibazo.
  - Bifuje kandi ko akanya nkako ko guhura bakishima kazakomeza, kuko iyo wishimiye muri Kristu bitanga amahoro mu rugo rwawe, mu baturanyi, n'aho uagenda hose.
- Bose batashye basingiza Imana, bamwe kandi biyemeza gufatanya n'abandi gusengera muri groupe Saint Paul.

**Tariki ya 21 na 22/01/09:** Musenyeri yayoboye inama y'Abapadiri bashinzwe umutungo muri Diyosezi zose zo mu Rwanda, bagena ibizafasha mu mirimo rusange Diyosezi zihuriraho n'ibigenewe Ihuriro ry'Inama y'Abepiskopi (C.E.P.R).

**Tariki ya 23/01/09:** Umuyobozi w'Inama y'Abepiskopi yayoboye abatunwe kubonana na Ministre wa Finances kugira ngo bigire hamwe ikibazo cya GEMECA Rwanda.

**Tariki ya 25/01/09:** Nk'uko byasabwe n'Inama y'Abepiskopi, muri paroisse hose bijihije umunsi w'urubyiruko.

**Tariki ya 26 kugera kuya 28/01/09:** Inama rusange ya Caritas Rwanda ihuza Abepiskopi, Umuyobozi wa Caritas n'abashinzwe Caritas muri za Diyosezi, yateraniye muri Foyer de Charité yo kw'i Rebero h'i Kigali.

**Tariki ya 01/02/09:** Musenyeri Alexis Habiyambere yayoboye Misa yahuriyemo Abiyeguriyimana ba Diyosezi ya Nyundo, kuri uwo muni nyine wabagenewe. Misa ihumuje baricaye barasabana.

**Tariki ya 02/02/09 :** Musenyeri Alexis Habiyambere yari mu Nama y'Ubuyobozi bwa Cité de Nazareth i Mbare (ni ikigo cyashinzwe na Papa cyita ku mfubyi).

**Tariki ya 3 kugeza kuya 6/2/09:** Inama y'Abepiskopi Gatolika bo mu Rwanda yateranye mu gihe cyayo gisanzwe yiga ibizafasha mu mirimo rusange Diyosezi zihuriraho muri uyu mwaka wa 2009 (budgets des services interdiocésains).

**Tariki ya 03/02/09 :** Abepiskopi babonye n'Umunyamabanga wa Leta ushinze iby'Uburezi bungurana ibitekerezo ku byerekeye ivugururwa ry'imyigishirize.

**Tariki ya 09/02/09 :** Umukuru w'Ababikira ba Bikira Mariya Mutagatifu b'i Namur yaje gusura Umushumba wa Diyosezi ku Nyundo. Yari azanwe cyane cyane no kumutumira muri Yubile y'imyaka 50 uwo muryango umaze mu Rwanda. Iyo Yubile izizihirizwa ku Kibuye ku itariki ya 21 Ugushyiraho 2009.

Ababikira ba Sainte Marie de Namur batangiriye ku Mubuga muri 1959, aho bashinze ivuriro n'ishuri ryisumbuye, baza no gushinga ibigo ku Kibuye aho bafite ishuri ryisumbuye, n'i Kibingo aho batangije ivuriro rikiriho, uretse ko jenoside yatumye badashobora gusubirayo. Ubu bafite n'izindi ngo zikomeye mu zindi Diyosezi. Tubifurije Yubile nziza !

**Tariki ya 10/02/09 :** Musenyeri Alexis Habiyambere yagiye guha inama za kibyeyi Abahire ba Nyina wa Jambo bari mu mwiherero ubategurira kuvugurura amasezerano yabo. Bayavuguruye bukeye kuwa 11 Gashyantare 2009. Kubera ko uwo muryango wari waratangiye, ufite abanyamuryango barenga ijana bari hirya no hino muri za Diyosezi (Nyundo, Kabgayi na Butare). Byabaye ngombwa ko Musenyeri Alexis Habiyambere ahagarika kwinjira kugira ngo abo bose babanze barerwe bikurikije amategeko ya Kiliziya. Ku itariki ya 01 Mutarama 2005, niho Musenyeri Alexis Habiyambere yemeye uwo muryango ku mugaragararwo. Maze ku itariki ya 11/2/2005 abari bamaze kurerwa basezeranira mu ruhamwe imbere y'Umwepiskopi. Ubwo yari inshuro ya gatanu bavugurura amasezerano yabo.

**Tariki ya 15/02 :** Musenyeri Alexis HABIYAMBERE yaturiyeye igitambo cy'Ukaristiya mu Iseminari nto yo ku Nyundo, atangiza ku mugaragararwo umwaka w'amashuri, biba n'umwanya wo gushima



Seminari kuko abana barangije Tronc commun babaye aba kabiri ku mashuri 560 yo mu Rwanda rwose.

**Tariki ya 21/02/09** : Madame Inge wo mu ishyirahamwe ryitwa « Enfants Orphélins du Père Martin Bajyambere », yaje gusura Umushumba wa Diyosezi. Uwo mushinga ufasha abana benshi mu byerekeye amashuri muri Diyosezi yose.

**Tariki ya 25/02/09** : Igisibo cyatangiyeho hose, kandi tugitangira turi muri uyu mwaka wa Paulo Mutagatifu. Ahenshi bashishikariye abakristu kuzifashisha inzandiko za Paulo Mutagatifu kugira ngo turusheho kwivugurura mu buzima bwa gikristu.

**Tariki ya 05/03/09** : Abahagarariye amadini bagiranye ikiganiro n'Umunyamabanga Mukuru wa Komisiyo y'Igihugu y'Ubumwe n'Ubwiyunge.

**Tariki ya 07/03/09** : Padiri Edouard NTURIYE yaburanishijwe n'Urukiko Gacaca , akatirwa igifungo cya burundu cy'umwihariko.

**Tariki ya 10/03/09** : Abepiskopi bagize itsinda bita Akanama Gahoraho (Comité Permanent) bateraniye i Kigali.

**Tariki ya 11/03/09**: Ku Gisenyi kuri Stade Umuganda, habereye isengesho ryo gusabira abarwayi ryayobowe na Frère Pio KINTU ukomoka mu Gihugu cya Uganda akaba ari uwo mu muryango w'Abafransikani ba Mt.François d'Assise. Ryabanjirijwe n'igitambo cya Missa yayobowe na Padiri Mukuru wa Paroisse ya Gisenyi, ari kumwe na bamwe mu Basaserdoti.

Iryo sengesho ryitabiriwe n'abakristu benshi bavuye impande zose, barimo n'abanye Congo baje barangajwe imbere n'Umusaserdoti wabo.

Frère Pio amaze iminsi mu Rwanda, akaba afite impano yo gusabira abarwayi kandi akirukana amashitani. Hano ku Gisenyi, ndetse n'ahandi yashoboye kugera hose, yafashije benshi mu bari barahanzweho na roho mbi, agarura n'abari barataye ukwemera muri Kiliziya Gatolika bari baragiye mu yandi madini. Yashishikariye abantu gukunda igitambo cy'Ukaristiya kuko ariho turonkera umukiro, tukahakura n'imbaraga zituma dushobora gukora ugushaka kw'Imana. Yongera kubashishikariza kwisunga Umubyeyi Bikira Mariya , bihatira kumwiyambaza bavuga ishapule buri munsu, mu kizere cy'uko azaduhakirwa ku Mwana we, kuko ariwe Muvugizi wacu. Ati nimwemera ko Imana ari Umusumba byose, waremye ijuru n'isi n'ibiyiraho byose, mukemera kandi mwizera ko ibafitiye urukundo rw'indengakamere kandi ifite ububasha ku byo yaremye byose, ntimuzongera guhangayikishwa n'imibabaro muterwa n'indwara ndetse n'ibindi, mupfa gusa kuyemerera maze Yo yonyine ikabigarurira.

Bamwe mu bakiriye muri iryo sengesho, ubu baratanga ubuhamya muri paruwasi zabo.

**Tariki ya 20/03/09** : Umukuru w'Umuryango wa Mutagatifu Boniface (Institut Saint Boniface) uba mu Budage , yaje ku Nyundo kuramutsa Umushumba wa Diyosezi. Abiyeguriyimana b'uwo muryango bafite urugo muri Paruwasi ya Gisenyi ahitwa Mbugangari.

**Tariki ya 22/03/09** : Musenyeri Alexis HABİYAMBERE yizihije imyaka 12 amaze ari Umushumba wa Diyosezi ya Nyundo. Nta birori bihindagana ahubwo wabaye umunsi w'umushyikirano, abantu baza kumufasha gushimira Imana ibyiza igirira Diyosezi ya Nyundo ibimunyujijeho.

**Tariki ya 25 kugeza kuya 29/3/09** : Abepiskopi Gatolika bo mu Rwanda n'abo mu Burundi bahuriye mu nama yabo ibahuza (ACOREB). Bayikoreye i Gitega ho mu Burundi.

**Tariki ya 28/03/09**: Musenyeri Alexis HABİYAMBERE yifatanyije n'abandi Bepiskopi, Abapadiri, Abiyeguriyimana n'imbaga y'abakristu ba Diyosezi nshya ya Rutana mu birori by'itangwa ry'Ubwepiskopi bwa Myr Bonaventura NAHIMANA, Umushumba wa mbere w'iyi Diyosezi ya Rutana.

**Tariki ya 31/03/09**: Musenyeri Kizito BAHUJIMIHIGO Umushumba wa Diyosezi ya Kibungo akaba n'Umuyobozi wa Diyosezi ya Ruhengeri, ari kumwe na Musenyeri Michel NSENGUMUREMYI Vicaire Général wa Ruhengeri, baje kuramutsa Umushumba wa Diyosezi ya Nyundo n'Abapadiri babana.

Aha niho dusoreje udukuru twacu, tuzakomeza ubutaha.

BAMURANGE M.Françoise